

四庫全書

集部

欽定四庫全書

王子安集卷十二

唐 王勃 撰

頌

九成宮頌

并序

臣聞在天垂曜璿宮列乾象之墟在地班形珠闕鎮坤  
靈之野洎夫三精軒運即寥廓而為宮九聖旋游遍洪  
荒而可宅則有瑤房玉室崑山分大帝之庭金屋銀臺

滄海濯玄元之宇豈非神明其道騁仙轡於無垠浩蕩  
其居示清都於不宰若夫扃牖六合奔走八神占日月  
而揆山川駕陰陽而法天地非聖人其孰能與於此乎  
至若文開遯甲仇峰城蒼后之躔樂奏鈞天峒嶺駐黃  
軒之駕業融環堵下姑射而尋真道濟巖廊望衡山而  
展事斯則三階遍下唯臨布政之宮六位時乘未及巡  
方之館其後兩龍齊驚抗瓊闥而同嬉八駿高驤指瑤  
池而結興殷風不競砂丘雄別館之娛秦道無章雲閣

狗殊庭之賞於是功虧大壯頌闕祈招豐屋同忘危輶  
繼及遂使來年侯跡名山為縱觀之塲並海遵河沃野  
盡行宮之地皇天震怒於上蒼黎眈慟哭於下土其有  
斟酌千古文明一代薦官不陋茨山可仰祈誠東岳唐  
帝復衙室之尊用饗西岐天子合鈞臺之運得其道也  
蓋有存焉國家梯霄架極罄域裁基纂高邱白雲之屑  
鬱函都紫氣之兆宸扉既闢一宇宙而來王聖籙潛躋  
貳乾坤而作帝高祖天旗夜立制黃馬而先驅太宗日

馭晨飛醪綠蟠而首出雖立極承桃之業進燭前文而  
重光累洽之符歸功下武陛下承靈太乙踵睿登三星  
虹沓祉電虬發慶丹書碧篆神符煥河洛之文玉斗珠  
衡天骨挺皇王之表用能捨桐圭而宣乂鬯肅玉籍而  
揖宗祧寫霽九天騰景萬里御風雷七曜於上博臨之  
功顯用山川六府而下輔相之宜得玄宮密運敷造化  
於靈襟黃屋神凝創經綸於寶思鳳闈宵靜陰靈宣玉  
闔之華鶴禁朝趨離象峻銅樓之景川分帝子控鯢壑

而疏源岳動天孫擁熊山而列鎮其化成也如彼其強  
幹也如此猶乃停旒正室嚴續中軒玉階匪泰金門為  
險佇虹旃於月澗岳瀆生光飛鶴蓋於烟臯江湖動色  
桃溪逸彥塞丹井而歸風松磴遺英斬玄關而奉制位  
兼河海九卿參巨濟之功道合星辰三事鬱經天之象  
朱轡緝化泣故老於中溪墨綬宣風繞春童於上陌王  
化之基已洽天工之代有序建銅儀而測曜象緯齊懸  
按璿璣而書雲禎氛疊舉祥囀十二紫鵷調夏谷之音

大禮三千嶺蛇應黃鐘之曲蠶功順令業著於青裳蜃  
磨迎春恩周於黛耜黃砂靜讞爽鳩興頌足之悲丹石  
銷寃神獬輟推鋒之計詠時和於帝壤動植咸驩歌道  
泰於華封昆蟲自樂星墟列將輝玉節而長驅天策神  
兵下金壇而決勝橫塵赤坂蔥山成不戰之郊命繳青  
丘桃野見其亡之兆烟馳火徼勵珠產而移琛雪驚冰  
洲駕瑤谿而納賁乾坤徑復載遵赤縣之封曦望環周  
未出黃圖之域故夫含吐萬物至功也制平八表大業

也一陰一陽神道也乃文乃武聖圖也用能使天不愛  
寶地不藏珍日月五行風雲四序龍章鳳彩舄奕於郊  
墟黃鉉紫玉磊砢於垺圉集風雲於翠簾浴甘露於朱  
英澤馬飛鑣山輿結轍殊徽狎至祥書竭東郭之毫累  
譯同歸朝冊盡南山之竹然後瑤壇備物陳帝服而展  
皇儀石室疇庸登太山而小天下功弘事畢狹廣宙而  
三遷風舉雲搖歷神都而一憩考遺基於汶上稽故典  
於淹中光總章之瑞紀嗣乾封之寶厯大矣哉昇中作



審握四海而為尊則大斯模肇三宮而配永憑太室而  
高視靈壇八百坐明堂而恭已諸侯一萬時既貞矣襄  
城辭訪道之遊功既成矣玄圃頻尋仙之駕繇是南宮  
奏議和玄禁而成章西土謳歌指皇輿而佇眷咸以珍  
臺靚穆陽靈開避暑之宮清序鈞調景福制追涼之殿  
然則高棟深宇威神之大節也順氣發生巡遊之大功也  
況乎石城金室偏興井鬼之區珠藪瑤池宛在秦幽之  
境應雷輶而出豫蒼帝其時回炎馭而思和朱明不遠

雖途吟野忤黎元忻望幸之符而屈已從人天子下勞  
謙之詔候離局而從宴尚惕三危清近縣而移鑾猶詳  
再駕以為三十六所帝劉非舜禹之心四十二宮全趙  
異成康之厯詠荆臺而夕厲思蒲坂而晨凝方奉後天  
之期俯順觀風之請萬靈禋社三辰合慶姬文考筮容  
成奏日千旌鳳轉儼鏤象而星陳萬騎龍嘶伐靈鼉而  
曉徹靜惟宮於綠野肅帳殿於黃街奔橈槍而走陸梁  
陳浮靈而候明月前驅電竦下列缺於騰鞭後乘雷驚

起豐隆於驟轂瓊戈畫灑太陽疲轉日之鋒玉劍宵翻  
懸象睹銜星之氣天旋霧散岳運川迴林兵護野方神  
啟路黃麾紫蓋襍精氣而西浮雲動神行背封巒而右  
指吐霧馳風以臻夫九成宮禮也爾時峰橫地乳景戴  
天廡分閭井而圖基蔭秦星而耀趾靈墟寶藏代興沂  
雍之間峻阜長岑疊鎮岐梁之域丹溪碧洞吐納虹霓  
偃柏叢篁騰遷雨霧獲秦餘於故兆地擬林光訪周舊  
於遺風山連水滸前趨劍棧玉壘千尋旁望斗城金墉

萬仞架陰丘而北走境瞰廊祠分沓嶂而西馳塗交隴  
坂仙都密邇猶連上苑之局靈宮巋然直透崇岡之曲  
即橋基於礪道利在斯干因拱木於虞衡規同匪日彌  
峰跨谷層城萬轉歷險乘危迴廊四注山祇盡石出微  
道而終年風伯羸糧半長途而中宿架千樓而檄極爛  
若神扶羅萬戶而窺天魏如化立離堂早照皦日籠光  
於綺寮合殿宵深歸雲納影於重廡珉房砥室畫拱相  
望綠岫紅巖雕櫺間出玄熊蚺蜥俯棟宇而危心青鳥

歸飛仰靈軒而墜翼轉飛檐於秀嶧上出重冥陰反宇  
於迴谿下臨無地紅葩紫葍垂倒井而披文金鎖銀鋪  
接重局而炫色儼鉤陳於漢陌秦階非遠設陞戟於烟  
莊仙梯可陟華瑤壁散掛明月於崇朝密網珠連落奔  
星於已曙丹標發秀彩沓虹文皓壁凝鮮光含蜃氣銅  
龍對雷接飛泉而瀑流鐵鳳連甍迴還颺而佇立雖南  
躔統序北室開榮凜勁氣於叢楹起淒風於洞穴跋烏  
失轡出澗戶而無光金兔低輪下山扉而變色陰庭阻

夏祝融無竊據之因邃屋乘春顓頊定忘歸之策飛廉  
扣響赴北闕而神寒屏翳收津跼南端而股戰蒼蒼八  
桂白露為霜落落千松玄陰昧景金人列陛來危砌而  
思襄玉女窺牕伏增巒而請續陽秋代駕不凋仙圃之  
華天地為鑪未解幽陵之凍至若氣清乾步景霽山維  
栖翠靄於崇榮列朱霞於複榭瓊枝累道移綴文槐碧  
樹周阿光搖鏤檻靜簾帷而洞啟穆羽相和肅坻堦而  
天臨纖塵不動宸儀有睟蓬萊與城闕俱榮羣后多歡

薜蘿共簪裾合賞巖花落砌綴龍屐而成文嶂葉交軒  
拂鸞旗而追影壚峰轉靄香傳玉几之風石瀨鳴湍響  
入銅壺之水乃有陵陽駕鶴奉丹墀而稱臣子晉吟鸞  
下青蒲而謁帝箕精失耀傳說恭命於東廂昴宿低芒  
庭堅奉職於西序三臺九署雲端極目霓裳風髻闕下  
相尋張良卧疾攀赤松而有地綺季來朝歌紫芝而忘  
返若夫功成盱食道濟宵衣漢宮追聽覽之餘堯殿得  
巡來之隙霞登月憩光睿幸於彤闈玉振金聲藻宸章

於翠掖洛陽才子承閒盡宣室之談蜀郡詞人還奏動  
甘泉之賦復有軒庭十四出桂間而乘茵永巷三千望  
椒塗而奉幣翊鸞臺之廣宴扈駕砌之仙遊羅綺芳兮  
四面春環珮鳴兮九重暮風闋夕敞攜少女於歌筵月  
幌宵朧下嫦娥於舞席玄房埃宴雲姬辭豹尾之歡紺  
幄承顏星媛入魚鱗之戲若乃屯營櫛比對閭道而斜  
趨廨寺棊分混文昌而外屬周朝瑞鷺聲參叶律之宮  
陳寶鳴雞響離司晨之序名都廣會閭閻萬室帝籙仙



垣亭阜千里山村野塾家連菌草之園谷飲川居戶有  
桃符之水故夫恩加草樹園原澤而無私道被翔行苑  
山川而不禁每至旻天戒序高風嘯律虞官獻秋獮之  
儀司馬奉梁騶之典將軍布卒畧玄灞而東馳都尉闕  
營繞黃山而北睇於是逢蒙列階蚩尤並轂材官發射  
期門走仍仗玄麾而直指鶚視千羣奮朱鬣而橫行龍  
驤萬計層旗廣旆出宇宙而三驅疊鼓鳴鐘連雷霆而  
一呼前旌逐日夸父斷黃河之流後騎超山共伯挾崑

崙之柱近陵吐焰縹奔電於長鋒灌莽生塵隕飛霜於  
勁鏃合戈鋌而照地猛兕知窮振罟網而籠天騰龍失  
據崩林磔石毛羣無挺險之資蔭澤風山羽族落垂雲  
之影長圍躑躅得駿馬於秦垌大輅徜徉載飛熊於渭  
浦然後還師振旅考事陳功皮軒按節牙璋復路視餘  
生於大野誓廣技於長陬班腥於截薛之墟有蜡於長  
楊之館命奔蜂而舉醕火照甘泉總輕騎而行庖雲驚  
上路聲兼萬籥歌鐘空廣樂之庭禮被三雍玉帛盡塗

山之會龍胎鳳卵入禹膳而調芳石乳瓊漿委堯樽而  
湛色恩霑下帛宴液仙宮雖大夫思濯鷄之歡而天子  
可迴鸞之奏然後拜釐清廟考德齋宮用玄工而有不  
宅太虛而無迹動崇易簡規萬祀而化黃金道貫幽明  
徵百靈而響丹旣得玄珠於舜海尚警冰危朗天鏡於  
堯儀猶勤日昃虔恭上帝東朝懸待諫之旌清問下人  
南面聽登聞之鼓則有郊童侯蹕敢讓天師野老排閭  
唯歌帝力風行比屋忠臣收折檻之謀化溢康衢良使

息埋輪之請設神規而動俗庶績其凝握元符而發祉  
殊方合應華胥已泰濟羣生於不死之庭閭閻可觀致  
仙歷於無窮之境蕩蕩乎發育萬物而顯諸仁洋洋乎  
包舉六氣而藏諸用均兩儀而得一恥三皇而不四者  
矣臣勃東臯賤節北臯幽姿常叨召見之恩驟玷明啟  
之列書生謁相望闕推輪下客遊梁榮參賜帛終童立  
志空投函谷之繻馬令同時未給尚書之筆雖玄機妙  
鍵已寂兆於忘言而詠德陳功請追聲於匪頌其詞曰

九門浩蕩三山超忽帝坐金房仙成玉闕浮丹麗紫樓

霞冠月真匠難徵虛談易越

其一

旋窺鳳紀極睇龍墳層巢化沒上棟爰分茅宮蔽雨松

殿來雲猶迷匪陋尚缺斯文

其二

道倫明一風遷繼五禮讚三宮詩歌百堵黃圖未洽紫

庭無輔局促墉垣逡巡度矩

其三

盛衰環襲沖盃舛驚璿宇夏闕瑤局殷樹奢窮地絡毒

流天步相日遄奔尋雲速仆

其四

災延六國運逼三川分雄競侈禮僭圖全飛薨月徑列

廡霞阡乾谿敗楚碣石亡燕

其五

阿房秦構文軒五里建章漢立仙閣萬祀詭代齊涇達

天縱已望夷有釁甘泉不祀

其六

宛郊嗣籙譙鄉警衆蜀跨梁岷吳吞楚夢相宜裁軌崇

楹累棟雲闕同華泉臺罕共

其七

晉圖終否胡風肆極霧黷丹圉塵埋紫域皇階不守帝

庭無色帳殿相臨氍毹間飾

其八

南承有宋北洎亡隨功慚戶牖守在城池樓船水覘車

陣山窺吳庭再毀代鼎三移

其九

火德初融江陽振旅奄收淮船遂朝吳渚象錯驕秦龍

舟壞英雄圖乃溢傾宮不處

其十

海岳呈華風雷寫慶剪諸戎首先我靈命紫氣雲蒸黃

星月映輔商為業遵唐啟聖

其十一

景閔丹繩祥抽翠籙格天垂範模神驚躅朱極重光黃

離繼旭道清金鏡時和玉燭

其十二

徵規鳳闕毓訓鸞闈桐宮宿列桂邱霞飛台精變道岳

耀裁幾朝盈振驚境比馴羣

其十三

武韜弓矢文經步驟爽鳩議獄龍師掌奏玉帛華夷提

封宇宙譯書歲款祥圖月湊

其十四

帝功得一乾元用九鏤玉天齊塗金社首神京四邑明

堂八牖變而可大為而不有

其十五

璿宮望幸幸封佇悅伺隙披圖乘時徙轍赤駟俟駕蒼

虬按節月車宵移星闌曉列

其十六



方神護野岳將清塗迴麾嶠路逗蹕山樞千靈電驚萬

辟風趨釣臺有問峒岫無虞

其十七

五城分秀雙巒抗影畫拱彌峰雕甍互巔烟閣夜謚雲

房畫靜竹殿栖寒松軒祕景

其十八

紫庭晨御彤闈早開天子凝旒辟公奉璧薜蘿齊致簪

裾混迹仙鶴隨輪靈鳧墜舄

其十九

風局濬敞震廓藻邃玉網星開金鋪月墜山樓獸矯雲

臺烏次複嶂披丹迴流轉翠

其二十

仇夷聖宅姑射神心樂翔丹鳳使引青禽義壇葉暗禹

洞花深沼分瑤水苑跨珠林

其二十一

順時宣節分戎講將星騎朝飛雲羅夕張寶雞獲祉非

熊入貺駕掩岐蒐禮高秦望

其二十二

艷庭未遠塗山有戲襄野迷軒清都宥穆罕夷乾步徒

豐帝屋光總大猷允歸天祿

其二十三

命官垂訓靈臺韻雅功映寰中頌流天下皇圖已泰鴻

筆難假帝有力焉惡非能者

其二十四

王子安集卷十二

欽定四庫全書

王子安集卷十三

唐 王勃 撰

碑

益州夫子廟碑

述夫帝車南指，遡七曜於中階；華蓋西臨，藏五雲於太  
甲。雖復星辰蕩越，三元之軌躅可尋；雷雨沸騰，六氣之  
經綸有序。然則撫銅渾而觀變化，則萬象之動不足多。

也握瑤鏡而臨事業則萬機之湊不足大也故知功有所服龜龍不能謝鱗介之尊器有所歸江漢不能竊朝宗之柄是以朱陽登而九有照紫泉清而萬物覩粵若皇靈草昧風驪受河洛之圖帝象權輿雲鳳錫乾坤之瑞高辛堯舜氏沒大夏殷周氏作達其變遂成天下之文極其數遂定天下之象衣冠度律隨鼎器而重光玉帛謳歌反宗禋而大備洎乎三川失御九服蒙塵俎豆喪而王澤竭鐘鼓衰而頌聲寢邵陵高會諸侯輕漢水

之威踐土同盟天子窘河陽之召三微制度乘戰道而橫流千載英華與王風而掃地大業不可以終喪彞倫不可以遂絕繇是山河朕兆素王開受命之符天地氤氲玄聖舉乘時之策興九圍之廢典振六合之頽綱有道存焉斯文備矣夫子姓孔氏諱丘字仲尼魯國鄆人也帝天乙之靈苗宋微子之洪緒自玄禽翦夏浮寶玉於南巢白馬朝周載旌旗於北面五遷神器琮璜高列帝之榮三命雄圖鐘鼎冠承家之禮商丘誕睿下屬於

防山泗水載靈遙馳於汶上禮樂繇其委輸人儀所以  
來蘇排禍亂而構乾元掃荒屯而樹真宰聖人之大業  
也若乃承百王之丕運摠千聖之殊姿人靈昭有作之  
期嶽瀆降非常之表珠衡玉斗徵象緯於天經贊據龍  
蹲集風雲於地紀亦猶三階瞰月恒星知太紫之宮八  
柱衝霄羣嶺辨中黃之宅聖人之至象也若乃順時而  
動用晦而明紆聖哲於常師混波流於下問太陽亭午  
收爍火於丹衡滄浪浮天控涓涔於翠渚西周捧袂仙

公留紫氣之書東海振衣郊子敘青雲之袂接輿非聖  
詢去就於狂歌童子何知屈炎涼於詭問聖人之降跡  
也若乃參神揆訓錄道和倪辱太白於中都絆乘黃於  
下邑湛無為之跡而衆務同并馳不言之化而羣方取  
則雖復霓旌羽旆齊人張夾谷之威八佾三雍桓氏逼  
公宮之制泊乎歷階而進宣武備而斬俳優推義而行  
肅刑書而誅正卯用能使四方知罪爭歸舊好之田三  
家變色願執陪臣之禮聖人之成務也若乃乘機動用



歷聘栖遑神經幽顯志大宇宙東西南北推心於暴亂  
之朝恭儉溫良援手於危亡之國道之將行也命道之  
將廢也命歸齊去魯發浩歎於衰周厄宋圍陳奏悲歌  
於下蔡聖人之救時也若乃筐篚六藝笙簧五典折旋  
洙泗之間探賾唐虞之際三千弟子攀睿化而升堂七  
十門人奉洪規而入室從周定禮憲章知損益之源反  
魯裁詩雅頌得絃歌之首備物而存道下學而上達援  
神敘教降赤製於南宮運斗陳經動玄符於北洛聖人

之立教也若乃觀象設教法三百八十四爻四十有九  
窮神知化應萬有一千五百五十有五成變化而行鬼神  
觀陰陽而倚天地以鼓天下之動以定天下之疑索衆  
妙於重玄纂羣微於太素聖人之贊易也若乃靈襟不  
測睿視無涯石砉昭集隼之庭土缶驗獷羊之井稽山  
南望識皓骨於封禺蠡澤東浮考丹萍於夢渚麟圖鑑  
遠金編題佐漢之符鳳德鈎深玉策筮亡秦之兆聖人  
之觀化也時義遠矣能事畢矣然後拂衣方外脫屣人

間莫楹興夕夢之災負杖起晨歌之跡撓虹梁於大厦  
物莫能宗摧日觀於魯丘吾將安仰明均兩曜不能遷  
代謝之期序合四時不能革盈虛之數適來夫子時也  
適去夫子順也為而不有用九五而長驅成而勿扞撫  
雲霓而高視聖人之應化也自四教遠而微言絕十哲  
喪而大義乖九師爭大易之門五傳列春秋之輻六體  
分於楚晉四始派於齊韓淹中之妙鍵不追稷下之高  
風代起百家騰躍攀戶牖而同歸萬匹驅馳仰陶鈞而

共貫猶使絲黃金石長懸闕里之堂荆棘蓬蒿不入昌  
平之墓聖人之遺風也遵揚十聖光被六虛乘素履而  
保安貞垂黃裳而獲元吉故能貴而無位履端於太極  
之初高而無名布政於皇王之首千秋所不能易百代  
所不能移萬乘資以興衰四海繇其輕重雖復質文交  
映瞻禴祀而長存金火遞遷奉琴書而罔絕蓋易曰觀  
乎人文以化成天下又云聖人以神道設教而萬物服  
焉豈古之聰明睿智神武而不殺者夫國家襲宇宙之

淳精據明靈之寶位高祖武皇帝以黃旗問罪杖金策  
以勞華夷太宗文皇帝以朱翟承天穆玉衡而正區宇  
皇上宣祖宗之累洽奉文武之重光稽厯數而坐明堂  
陳禮容而謁太廟八神齊饗停旒太史之宮六辨同和  
駐蹕華胥之野文物隱地聲名動天樂繁九俗禮盛三  
古冠帶混并之所書軌八紘閭閻兼匝之鄉烟火四極  
竭河追日夸父力盡於楹間越海陵山豎亥塗窮於廡  
下薰腴廣被景貺潛周乾象著而常文清坤靈滋而衆

寶用溢金膏於紫洞雨露均華栖玉燭於玄都風雷順  
軌丹瑩翠茵藻繪軒庭鳳彩龍姿激揚池籞殊徵肝鬢  
不召而自至茂祉昭彰無幽而不洽雖復帝臣南面降  
衢室而無為岱畎東臨陟名山而有事靈命不可以辭  
也大典不可以推也繇是六戎宵警橫紫殿而撓金五  
校晨驅蹴玄雲而噴玉星羅海運嶽鎮川渟登碧墀而  
會神祇御玄壇而禮天地金箱玉冊益睿算於無疆瓊  
檢銀繩署靈機於不竭功既成矣道既貞矣歷先王之

舊國懷列聖之遺塵翔赤驥而下雲亭吟翠虬而望鄒  
魯泗濱休駕杳疑汾水之陽尼岫凝鑒暫似峒山之典  
乃下詔曰可追贈太師託鹽梅於異代鼎路生光寄舟  
楫於同時泉塗改照咸亨元年又下詔曰宣尼有縱自  
天體膺上哲合兩儀之簡易為億載之師表顧唯寢廟  
義在欽崇如聞諸州縣孔子廟堂及學館有破壞并向  
來未造生徒無肄業之所先師闕奠祭之儀久致飄零  
深非敬本宜令諸州縣官司速加營葺九隴縣學廟堂

者大唐龍朔三年鄉人之所建也爾其州分化鳥境屬  
蹲鴟縈錦室於中區託銅梁於古地玉輪斜界神龍蟠  
沮澤之雲石鏡遙臨寶牒秘禺山之影天帝會昌之國  
上照乾維英靈秀出之鄉傷清地終庠序繇其糾合纓  
弁所以會同文翁之景化不渝智士之風猷自遠於是  
雙川舊老攀帝獎而翹心三蜀名儒想成均而變色探  
周規於舊宅詢漢制於成都開基於四會之躔授矩於  
三農之隙土階無級就擊壤於新歡茅茨不剪易層巢



於故事莊壇文杏即架椽樂樊谷幽蘭爰疏戶牖儀形  
莞爾似聞沂水之歌列侍閭如若奉農山之對緇帷曉  
闌橫紐帶於西河絳帳宵懸聚青衿於北海雖秋禮冬  
詩之化已洽於齊人而宣風觀俗之規實歸於上宰銀  
青光祿大夫譙國公諱崇義大武皇帝之支孫河間大  
王之長子高秋九月振玉贊於唐丘寶算千齡躍璇蚪  
於大渚我國家靈命東朝抗裘冕之尊宗子維城南面  
襲軒裳之重折玄元之肩緒擁朱虛之祿位拜玉節於

秦京輝金璋於蜀郡玄機應物潛銷水怪之災丹筆申  
冤俯絕山精之訟魏文侯之擁篲道在而謙尊董相國  
之垂帷風行而俗易司馬宇文公諱純河南洛陽人也  
皇根帝緒列五鼎於三朝青瑣丹梯跨千尋於十紀仲  
舉澄清之轡未極夷塗士元卿相之材先登上佐冰壺  
精鑒遙清玉壘之郊霜鏡懸明下映金城之域縣令柳  
公諱明字太易河東人也梁岳之英長河之靈沐雲漢  
之精粹荷天衢之元亨旌旗赫奕於中古珪組陸離於

下葉鳳巖抽律擢層秀於龍門驪穴騰姿吐榮光於貝闕自朱絲就列光膺令宰之榮墨綬馳芬高踐郎官之右仙鳬旦舉影入銅章乳翟朝飛聲含玉軫臨邛客位自高文雅之庭彭澤賓門猶主壺觴之境曠懷足以御物長策足以服人重泉之惠訓大行單父之謳謠遂遠猶為夏絃春誦俗化之樞機西序東膠政刑之根本上祇朝憲下奉藩維爰摛複廟之儀載闡重欄之制三門四表煥矣惟新上哲宗師肅焉如在將使圓冠方領再

行鄒魯之風銳氣英聲一變賓俞之俗於是侍郎幽思  
摘鳳藻於瓊林丞相高材排龍姿於璧沼遺榮處士開  
簾詮孝悌之機頌德賢臣持節聽中和之樂其為政也  
可久其為志也可大方當變化台極儀刑萬宇豈徒偃  
仰聽事風教一同而已哉勃幼乏逸才少有奇志虛舟  
獨泛乘學海之波瀾直轡高驅踐詞場之閭闕觀質文  
之否泰衆矣考聖賢之去就多矣自生人以來未有如  
夫子者也嗟乎今古代絕江湖路遠恨不得親承妙旨

攝齊於游夏之間躬奉德音攘袂於天人之際撫身名而永悼瞻棟宇而長懷嗚呼哀哉敢為銘曰

五帝既沒三王不歸天地震動陰陽亂飛山崩海竭月

缺星團禮樂無主宗禋遂微

其一

大哉神聖與時迴薄應運而生繼天而作龍躍浩蕩鵬

飛寥廓奄有人宗遂荒天爵

其二

尼山降彩泗濱騰氣志匡六合神經萬類夾谷登庸中

都歷試睿情貫一玄猷絕四

其三

栖遑教跡寂寞河圖違齊士宋歷楚辭吳風衰俗毀禮

去朝無麟書已卷鳳德終孤

其四

杳杳靈命茫茫天秩吾道難行斯文易失式宣六藝裁

成四術虛往實歸外堂內室

其五

邈矣能仁悠哉化主力制羣辟權傾終古陸離彩燦蟬

聯茅土涉海輕河登山小魯

其六

皇家載造神風四極撿玉題祥繩金署德聿懷聖跡同

亨天則迺眷台庭爰昇袞職

其七

玉津同派金堤茂版智士高風文翁澤遠毗淳壤沃聲

和俗愿載啟仁祠遂光儒苑

其八

沉沉壺奧肅肅局除靈儀若在列配如初槐新市密杏

古壇踈楹疑置奠壁似藏書

其九

泛泛寰中悠悠天下徇名則衆知音蓋寡硯石參瓊迷

風亂雅仲尼既沒夫何為者

其十

彭州九隴縣龍懷寺碑

粵若真元混沌抱一氣於天門象化童蒙構三靈於地

戶繇是金城逆順山河假成器之因玉燭沉浮風火兆  
流形之蘖懸大明於日月適滯泉宮設巨浸於雲雷終  
迷燬宅太極所以散而為兩洪飈所以吹而為萬雖復  
卑高異列俱沉方內之遊全集橫流共失寰中之契豈  
夫涅槃淙視不背色以求真般若長驅每乘空而得靜  
則知一名同出陰陽為破道之墟萬象皆空天地即降  
魔之境莫見其俯仰不知其去就至自於太虛復歸於  
無物其建言立德開業成務握大柄而推造化執洪鑪



而誥元始四門幽闢顧非相而遲迴三駕晨嚴臨有為  
而出頓豈不知羈孤長路終嬰旅泊之虞舟楫中流未  
釋風濤之苦將以宅心者寂虛室所以合符應物者神  
明鏡繇其不倦故能商榷宇宙指麾權實演羣生而非  
其力存庶品而非其有千巒閉景似居蓬艾之間雙闕  
臨空若在江湖之上其釋迦之沖用乎龍懷山者井絡  
之所交會岷隅之所控帶攢峰北走吐香嶂於玄霄巨  
壑南馳歛洪濤於赤岬香城寶地左右林泉碧岫丹岑

往來烟液時有法會禪師者俗姓楮氏吳郡錢塘人也  
金章錫美河陰傳九命之尊玉鉉乘榮江左受三台之  
貴地靈人傑自朝野而重光學府文宗冠南都而獨秀  
法師紫星降彩紅雲受氣應積善於高門契冥緣於累  
世果浮觴引潛圖彼岸之功聚礫延砂即揆為山之業  
靈樞密運闢仁路而長鳴慧刃高揮斬邪關而洞照以  
為冥機體化毫髮莫滯其真執數逐微乾坤不容其算  
於是四禪幽觀破銅堞而出無明三昧雄圖排鐵圍而

欽定四庫全書

王子安集  
卷十三

十三

泥非相法雲自在吐納龍宮賢聖不仁奔馳象域將使  
三千塔廟知真實之玄津萬億幡幢入空虛之秘藏安  
心樂土遯影靈闕以開皇元年憇于茲嶺靈墟福地已  
被神功玉牘金繩未光朝命蜀王秀以文昭建國帝子  
專征仗已服之尊名裂邛荒之寶命彤駢僭帝蹕萬騎  
於銅梁阜蓋圖王警千乘於玉宇鏡山南望志狹彭渝  
錦水西浮恥朝江漢開實沉之壁壘嘯京叔之風塵擁  
龜堞而託殊方憑爵堂而傲天子威權所制勝兵數十

州雄視所臨經塗五千里三英賦雪瞻秋月於梁臺八  
叟吟風傳朝雲於楚館思弘正法廣召名僧振錫雲趨  
乘杯霧合禪師括囊泉石韜跡烟霞攀紫桂而同塵守  
青蓮而向晦衝飈蕩岳寧移忍地之靈烈火焚山不撓  
堅林之色王心有悟時加優禮順風拜道封山謝失發  
淨財於廣內揆仙室於重幽因嶂為壁憑崖列戶以開  
皇五年始賜額為龍懷寺地鄰縣左遂均縣上之恩山  
似龍盤即建龍懷之刹爾其崇巒經復復礧縈迴高丘

洩雲長林翳日增瓊垣於下麓揆瑤構於中巖香闕神  
行珍臺妙立玉蚪銜霸絕游氣而負蒼天金鳳連甍排  
烈風而瞰玄圃延綠房於疊巘上拂霞莊蔓丹闕於重  
磯下披泉戶陽開陰闔變霜露於旋迴燂動螟飛起雷  
霆於指顧玉堂朝亘影襲長虹珠殿宵浮光含列宿禪  
師歿後爰有孝恭法師智開法師弘嚮法師寶積闍梨  
四上人者並禪師之上足而法門之領袖也五明衢路  
控引情宮八解源流朝宗性海其深為寶投白玉於蘄

巖無礙居真得玄珠於象罔住持真界栖息妙塗俱探  
寂滅之源各證菩提之域雖業定人境照已極於無方  
而道寄生成功遂覃於有相演中乘之奧義增上棟之  
宏規萬拱不騫千門有闢俄而帝隋大去皇家小往天  
地閉而賢人隱雲雷屯而巨寶衰毒龍橫霧四天沉暗  
逆之悲醉象驅風三界溺崩離之酷上人慧機幽晤定  
識潛融知佛日之恒明審王風之尚靜芝歌商岳揆難  
嶺而同歸茅藉磻溪與猴江而共致邈俗無悶因時有

待洎丹陵啟秩赤縣居尊迦維授手波旬革面十千天  
子新朝帝釋之宮八萬仙人始向毗耶之國一音演而  
荒景服三聖澄而禮樂備繇是巴方舊彥蜀城遺老仰  
慈門而知戶牖升福田而喜畊鑿雕鞍繡轄瞻驚愕而  
馳魂黼帶綖裾指鸚林而驚歎寶瓶宵注潤浹堯旬玉  
塵晨麾風調舜厯咸以為假沉其性迷生安視聽之功  
動亂其心窮子失肌膚之戀江連巫峽始絆心猿山對  
岵同終維意馬貞觀年中積閣梨等迺宣昭遺址發揮

精舍容成按厯揆日用於天經隸首陳章算神功於地  
籙迴廊窸窣自吐風颺列榭崢嶸坐含雲雨圖碣宮之  
妙質儼廬舍之真容寶珠周映銀龕備色逸多垂足似  
臨兜率之天師利分身若赴維摩之境靈仙可接藻繪  
無施真應難徵雕鐫有寄若乃巡積岨歷森沉天花照  
而高月落地籟驚而幽泉湧紫蘭花徑香侵柏葉之鑪  
綠草紋茵影入芙蓉之座真童鳳策即踐金沙仙女鸞  
衣還窺石鏡巖莊轉梵杳冥松桂之墟礧石栖禪寂寞



藤蘿之院法鼓奏而寒山曠洪鐘鳴而曉壑靜積苔翠  
蘚具不盡之靈衣石乳瓊漿入無生之妙饌肅肅焉遙  
遙焉信調御之珠庭而列真之甲第也爰有上座玄鑒  
法師等並六塵無我四諦非他奉乾越之微言守楞伽  
之奧府法雷潛吼鼓動風烟慧日揚明照臨丘壑青漢  
坐定見心宅之恒靈丹洞行忘覺身城之每化須彌不  
動迴鎮閭浮閣岷安居下觀忉利開四生之廣路敍六  
趣之彝倫足以遵揚真績恭宣來命者矣縣令柳公諱


明獻字太初河東人也太玄降氣中黃授彩襲周魯之  
榮基吐河汾之靈液四科高第振風翮於三冬萬室崇  
班跼雲驂於百里既而政成黎頌道洽毗謳假無上之  
幽筌毗不言之景化絃歌在韻將寶偈而齋歸銅墨成  
章與梵天而共貫瓊波湛淡沃蕩雲雷珠灌蕭條蔽虧  
煙雨貞機罕應良談於好事之游朗調多奇高賞盡名  
山之曲下走東臯事失南州塗窮歡孔席之栖遑笑楊  
岐之浩蕩薄游茲邑喜見高人三接而定琴樽七縱而

擒風月林宗有道相期清濁之間平叔能言見許天人  
之際從容宴語契闊胸懷欣性情之同冥感形骸之共  
遣雖玄都妙域已貴於忘言而義塾文場竊申於知己  
敢作頌曰

妙象無倪神功有涉湛淡名器崩騰事業慧路翹車禪  
河艤檝控引羣品輪迴庶劫縱橫宇宙反覆山川言因  
境立道寄形詮爰稽福地式揆珍田丹溪漏日碧洞栖  
烟閣都玉檻須彌石室榛灌溟濛風雲蕭瑟睟容乃眷

禪徒有謚葉磴三休花巖四密崇巒架殿疊嶂營樓千  
楣鳳起萬拱鸞浮星開紺髮月湛青眸神宮不夜遽閣  
長秋戶臨重嶠牕分絕嶺半漢香浮中天梵警鶴林聖  
迹龍泉佛影鳥思山空猿悲峽靜森森巨柏落落長松  
月出東岫霞生北峰山人自狎野老相逢白雲屢斷青  
溪幾重彭澤之令臨邛之客比德山藪重規泉石法宇  
成言慈門致役糠粃吏隱薜蘿心迹吾生擾擾與道遑  
遑殷勤頌詠惆悵津梁投劫翠碣助化玄場百年之後

苔蘚蒼蒼



王子安集卷十三

# 欽定四庫全書

集部

王子安集十四至  
六

詳校官監察御史<sub>臣</sub>劉湄

檢討<sub>臣</sub>何思鈞覆勘

總校官檢討<sub>臣</sub>何思鈞

校對官編修<sub>臣</sub>曹錫齡

謄錄監生<sub>臣</sub>吳濬

欽定四庫全書

王子安集卷十四

唐 王勃 撰

碑

梓州玄武縣福會寺碑

若夫考龍圖而括運撫麟筆以傷時天地閉而賢人隱  
周孔逝而微言絕豈非太階無象三辰鮮道敘之因滄  
海為陵百川有橫流之勢况乎法身長往顧糟粕以空

存化迹繁流仰舟航而遂遠雖復功推八正猶迷鶴樹  
之談道亞三明未覩龍宮之籍則有妙音難遇瞻雪嶺  
而投軀真諦希聲仰雲山而破骨優填企景新雕白玉  
之龕般若尋風而化黃金之像三千寶座迴出天宮八  
萬珍臺遙臨淨域非惠圖之冥感孰能臻于茲乎福會  
寺者隋開皇中之所建也爾其峰巒地列東分井絡之  
光樓雉雲橫西睹禺同之奧北彌豐邑里開千甍南控  
平江波潮萬里擁亭臯之絕勢昇林野之殊形肇開修



竹之園式揆旃檀之刹法川高闢慈宮峻敞文璫寶綴  
環日月於重廊翠拱丹楹起虹蜺於複殿真容俯映福  
衆爰依梵筵交燭禪房互啟山神獻果還栖交露之臺  
天女持香即遶飛花之閣輪輝夜滿抽紫焰於金山毫  
相晨臨發珠華於玉地爰有縣令柳邊河東令族大業  
之年來光上邑高人奉檄功為銅墨之先令宰鳴琴課  
穆絃歌之最眷香城而惻念披道肆而驚魂示懷延獎  
思弘末教迺於寺內起重閣一所乘烟置臬揆日端繩

層榭三休瑇簷四注奔星掛廡混珠網而同歸明月窺  
軒雜璿璫而共貫仍抽麗筆俯刊貞琰詞源迅委振法  
海之波瀾義宇宏深接禪宮之閭奧昔者陶潛彭澤罔  
聞仁祠之風潘岳河陽未入菩提之域兼其美者著在  
我柳君乎俄而帝隋方否三官失龍鳳之圖皇業未昌  
九野被豺狼之毒雖復餐砂茹石窺劍道而迴心蜂聚  
泉騰指銅梁而革面自非法雲西瞻潛銷火宅之氛慧  
日東來迴朗昏衢之景則安能冥資福地顯沮魔軍波

清於振壑之隅燎息於炎昆之曲洎乎大鈞無事神器  
有歸清玉戶而帝宸中轉金輪而王天下玄塲佛境與  
天壤而惟新鶯樹雞林共風雲而改旦功既成矣時既  
貞矣紫宸有裕蒼朮胥悅都人狎至瞻鴈塔而歡心野  
老相趨尋鹿園而頓顙或至誠冥發爭知不盡之虛或  
道恩苟流竟委忘緣之施乃於寺內造菩提塑像一座  
實彭氏絕羣之迹洞參瑤銑體備丹青得埏範之奇模  
盡陶甄之能事功分實相變入冥機丹果長春青蓮不

染靈儀若動似臨王舍城中神足疑行即坐菩提樹下  
銀牀地湧寶帳猶懸珍木天成金花不落總章元年又  
奉為皇帝更造八菩薩像成於淨境別峻崇堂而力寄  
羣緣功難獨舉遂令衆情馳騖空懷更始之圖靈座端  
嚴未得安居之地時有弘演上人自丹鳥下日昌帝籙  
於明堂青鶴乘霄降仙苗于大室軒冕將風雲交映鐘  
鼎與山河共遠法師宿持真諦幼挺殊姿拔五翳於長  
驅登四禪於迴觀以為德因時建澄什繼踵於西都道

冀人弘林遠隨肩於南國痛迷生之詭矯悲正覺之陵  
夷思欲樹真氣於未萌緒崇因於已往遍游淨境歷騁  
遐方至總章二年憇于茲剝身持寶印口出神珠心動  
巴南化行蜀右法羅潛舉馴鳥性於慈林慧鏡旁開息  
猿心於定水亦有情鈎五縛遙騰解脫之川想痊六塵  
迴拔沉迷之域名臣長者捐玉珮於銀庭善女靈姬落  
金環於寶地貪機霧滌法施泉流林衡掄杞梓之材班  
匠獻鈎繩之巧千藥電糾萬栢霞張飛陸綠甕曾構架

景瓊缸香照乘紺壁而宵分珠箔重華掩青疏而曉亂  
紅葩植井彩綴河宮丹桂承梁香交列肆天倡梵樂肅  
然忉利之天藻蓋瑤璫煥若摩伽之殿豈精力之玄感  
而神化之曲成乎直歲寺主等州間盛族驚驚榮因昇  
慧圃而功成踐魔庭而戰勝排四門而獨往共極邦緣  
攀十地而遐征同趨覺路縣令虞洽旌旗百代劍履三  
朝匡帝座而南征擁台庭而北面星像垂祉川岳載靈  
豫章七歲麒麟千里雄情負俗鬱王佐之宏圖英識邁

時得公門之逸氣既而拂衣華族入天邑而觀光列板  
仙臺出靈闕而作宰泉魚狎夜多單父之深恩隴翟游  
春嗣中年之善政有條不紊施緩政於繁繩斷訟有神  
下高鋒於錯節因以激揚大化潛滋比屋之封光啟令  
圖預積攀輪之慕縣丞裴休家接朱欄譽流丹闕軒裳  
照緒忠孝榮門鳥鳴有伐木之歌龍文非刈蓬之具高  
材列務盛德分司翰墨不足留神琴樽申其徇性十旬  
休沐奄有泉林千里邀迎乃疲風月青驪蹀躞終噴玉

而懸雲素鶴徘徊具銜珠而犯露加以沉研有地題橋  
八解之津誘勸無方叱御三乘之路故能使幽明仰德  
法俗依仁攀海祗而如歸挹衢樽而下瞰鄉望等龜靈  
高族驥子名家闢錦室於中堂分綺疏於甲第或望雄  
都鄙代列歌鐘或業預雲雷門藏璽詔文場促席有江  
漢之英靈武觀連衡得岷峨之銳氣竝能馳心彼岸欲  
臨海而褰裳投足化城下悲思而反袂下官薄遊江右  
旅寄城隅懷道術於百齡接風期於四海依然梵宇欣



象教之將行莞爾公庭惜牛刀之遂屈雖文殊辯論妙  
懸解而忘言而伯喈雄管叙真宗而罔媿敢巡此義乃  
作頌云金堤迴邑玉峽長瀾城闕紛亂江山聳盤雲屯  
勝邑霧啟禪壇右縈層雉左控崇巒竹園精舍檀山香  
閣萬拱騰虬千楣跂鶴晚星疎翠朝霞泛籟鼓奏泉流  
鐘鳴霜落時經失道代歷交呈神宮不撓法衆無驚金  
輪遽曉玉鏡施明功照佛刹化被王城帝圖冥運真儀  
濬發貝齒含星流毫推月鳥離山扃龍還海闕寶樹刑

留天宮匠設爰有真人式宣慈主發迹江甸馳聲蜀宇  
望遠連規攀澄襲矩力窮興道功周廊廡羣緣盱蠻衆  
福氤氲叢楹列電高棟銜雲銀龕曙撫玉座宵分瓊璣  
有爛藻繪多文鬱彼巘邑猗歟上宰松桂連華鴛鴦集  
彩禪津有裕至公無待火宅可辭舟航斯在我之飄寓  
邈矣來遊山川俯仰道義淹留承風郭外撰綴江幽玄  
機勝筆天地相周

梓州飛鳥縣白鶴寺碑

原夫玉都瓊室紫垣光大帝之庭金闕銀臺玄壁杜羣  
仙之域故能使神明有宅駕日月以長驅鸞鳳知歸撫  
雲霓而上出斯則曾巢瑾穴上皇迷棟宇之尊考室靈  
臺中右識巖廊之貴然後冕旒前序提四海以為家登  
步大階列千門而有闕況乎峭山形見旁行草昧之先德水  
源深光宅乾坤之右雖鶴臨西閼龍宮與王法同亡而象  
化東流鴈塔與遺儀繼起白鶴寺者蓋菩提寺之餘址  
梁武皇之所建也香城福地之舊三巴五蜀之湊裂岷

山之奧域分井絡之榮光西包玉壘之墟北瞰銅陵之  
野南扃列第門庭萬家東戶連峰岡巒千里實伽藍之  
勝跡得迦衛之英模憑絕磴以圖規俯長溪而作固自  
金陵不競玉鏡無章城池興南露之悲亭障切北風之  
候崩山關水觸地網而三分墜月奔星劃乾綱而五裂  
中原錯戾慈門為虎豹之墟滄海橫流定水穴鯨鯢之  
浦懷山既蕩法衆咸淪林院榛蕪軒堂委寂遂使悲生  
棄井堙玉甃於三泉歎積為山移瓊峰於九仞皇上攝

千秋之寶運緒三聖之宏機挾宇宙而先神御雷風而  
首出靈功不宰華夷沾共貫之恩至道無私霜露得平  
分之序考禎圖於日慎寤寐同符稽妙冊於年刀幽明  
合貺然後東巡巨鎮追六聖而撫寰中南面天壇朝萬  
方而小天下皇威既暢寶應齊歸川岳薦靈風煙動慶  
丹烏抱日疑增帝閣之華素鶴低雲若赴仙庭之會昔  
白魚黃竹業未峻於封崇赤鴈芝房名不登於梵宇爰  
徵瑞典肇錫嘉名重興波若之臺更起招提之院金繩

夕布綿秀嶺以開壇玉牒晨舒擁回峰而關戶爰有弘  
演上人者法門之秀士也行起常凍思越恒饑悲淨域  
之為墟喜皇波之普泛縱還舟於苦海驚浪旋夷比歸  
馭於邪山靈關非險於是淨財雲委真衆煙馳如趨摩  
竭之宮似向毗邪之國縣令梁弘悅首加甄緝縣丞梁  
敬一親昭施典上憑天旨爭開舍利之壇俯會衆心競  
起須彌之座禺同故嶺石鮮堅華廣漢餘垆地多疎斥  
事闕經始人懷祇懼重階不就空思天室之氓寶像無

資未獲黎陽之士豈非冥期肸鬻功參造化之外故能  
果脣間發運眸周映貝齒含滋璿毫起照三十二相臨  
玉座以相輝八十四儀擁金山而圓立層甍四合爍奔  
電於丹楹複殿三休絡浮煙於翠幌因高積磴疑遷倒  
景之臺架嶮連榮似立迎風之觀琚簷競注縈霧道以  
龍回繡栢爭飛倬雲衢而鳳矯寫歸禽於寶鏡誤接朝  
鸞圖走獸於文璫疑栖夕兔雷霆蓄洩裁臨承雷之間  
煙雨飛浮未出層巒之下耀丹青於菌壁妙跡疑存炳

銑鑒於蓮龕神輝自燭鏘鏘鐸聲傳桂葉之風焰焰  
山爐氣結松陰之藹仰真容於始旦滿月晨昭窺列棟  
於方宵長虹夜發香泉激溜有符溫淨之池珍木成行  
無忝祇園之樹信煦尼之別府實兜率之殊庭者乎愛  
友上座法師等情機藻瑩戒律圓明披玉筍以研芳候  
瓊鍾而肅慮禪姿曉映依稀同雞岫之前梵咀晨臨髣  
髴像魚山之曲縣令獨孤儉等或鵬垂待運終變道於  
中台或蠓屈求伸且毗風於下邑鄉望儀曹等或鹽泉



錦室家稱三蜀之豪或抱樸懷仁譽擁雙流之美或以  
為山川肆踐猶紀石於弇州陵谷生哀尚沉碑於峴首  
況乎德因時盛慶流封拜之辰名為功登事屬文明之  
運豈可使璿猷被物終昧變於玄機金字韜華不題勲  
於翠琰敢作頌曰

睿塗菌謁靈機翕忽玉架天都金裁地闕法玉利見香  
城繼發鴈塔齊雲龍宮瘞月長江近域廣漢遺居禪局  
共往梵宇全疎迹均梁後義切秦餘山川牢落榛莽丘

墟有聖聿興惟皇降撫因天因地為雲為雨日觀龍驤  
煙壇鶴舉肇開嘉號重光淨土猗歟上士道場真政物  
觀成章子來興詠土石呈彩人靈合慶寶座晨嚴金山  
夕映紫微分殿青岑曜郭複岫榮樓攢峰跨閣月低璿  
鏡星連寶鐸彩鳳將飛蟠虹未落森沉桂宇肅穆筠壇  
花明桺砌葉暗朱欄溪留夏雪澗咽秋湍山虛梵冷谷  
靜鐘寒法衆爰依禪徒戾止望風三蜀征塵千里頓首  
玄輝歸心翠宸業超有色功齊無始偉哉冥化妙矣能

仁去來均跡前後俱身寂滅為樂般若為因題芳翠琰  
敢詣靈津

梓州通泉縣惠普寺碑

若夫玄機默運披睿烈於三精素鍵潛融肇神功於萬  
彙則有靈期肸鬻龜龍負河洛之圖帝緒氤氲賢哲舉  
乾坤之策雖功懸日月終植軌於寰中業靜雲雷未逃  
規於象外爾其譯雉林之寶偈詮鷲嶺之真圖抽紫玉  
於禪山朗玄珠於智水不生不滅光臨妙物之津無去

無來濬發乘時之契仗三明而獨運施洽平分據二諦  
而同歸功超邃古故能使三千法界向風知衽席之師  
百億大王聞道失巖廊之貴非釋迦之神化其孰能與  
於此乎既而正法將隱微言不嗣應身既沒遺儀間起  
恒星夜掩西天銜風霧之悲夢日宵成東漢肅壇場之  
禮繇是鹿園曾啟象教菊流宣妙獎於希夷範靈蹤於  
顯晦瑤龕寶座光華震旦之墟鳳刹蛺蝶裳斧藻闔浮之  
域其寺蓋梁大同年中所建地分彭蜀嶺對岷峨憑廣

漢之遺墟籍隄為之舊壤西馳峭崿山連白雉之郊東  
赴長川江走黃牛之峽崇墉却峙之勢庭衢四會勝里  
九曲之分閭閻萬積危冠衺服參差軒蓋之前露渚風  
畦隱軫亭臯之望是惟先鏡實啟香城煥若神明恍同  
化出紺壇煙屬疏絕閣而三休紫殿雲深徹迴廊而四  
注重欒複棟霧緝霞張繡栢瑀楣鸞伸鶴跂珍臺控景  
羲和獲練轡之因綺榭裁氛屏翳得停鑣之所連甍積  
翠交玉鎖於星衢洞戶流丹綴金鋪於月竇垂珠網露

傍傾漢浦之琛列鐸吟飈上合鈞天之樂固以輪奐之美冠真宰以先鳴琯範之奇告靈基而得雋乃造彌勒下生像一座相好端足華姿朗備貞觀末年靈暉繼發房籠匝曜疑連不夜之城戶牖皆明似出重昏之境自非理參幽贊道叶冥機宣佛鏡於無方演慈燈於已絕豈能寫丹青於實相妙色長存圖銑鑒於真容神光不昧若乃時暄福地低落照於晴暉候肅禪房汎初華於霽景千千寶樹若在雙林一一妙香仍清八味山暉徠

脫跂葉嶼而相鳴野鶯迎春拂花簾而自樂松楸秀蔓  
曲成蘿薜之衣砌石生蓮直起芙蓉之座則有拖身童  
子戾止巖扃忍辱仙人來儀礪戶都人野彥希梵席而  
投裾趙美燕餘望齊庭而繼履莫不青鳧委貫俱欣不  
捨之壇紫貝兼明共化無緣之力故能使珣形畫塔象  
設年滋彩帙瑤箱龍編月以豈西周之道備南國之風  
成者乎爰有寺主等覃機色外練迹塵間浴甘露於心  
田集祥風於性宇栖情不二忽起初地之權授手大千

猶擁彌天之具縣令等或公侯百代玄貂列駟之門或  
文史三冬吐鳳迴鸞之客銅章墨綬任切臨人鐵印黃  
轡功宣陸漸局牛烹而待價肆蠖屈以求伸揮鋒九仞  
之隅作鏡雙流之外錄事抑元等丹軒紫紱家傳方面  
之勲驥子魚文地列膏腴之右昔承隋運屢委天書爰  
自皇初顓流帝禮等賓渝之奉漢類微濮之匡周咸申  
白馬之盟並受飛龍之託故能遺風罔墜代濟其美望  
重西南功宣法俗咸以為絃歌小政猶篆德而垂芳鐘



鼎徽榮尚銘勲而作鑒况乎神威自在方傳宰匠之功  
豈可棟宇常存不勒山河之贊爰託幽鄙奉揚徽猷敢  
宣此義而為頌曰

天地定位君臣作極道在巖廊功霑寰域尚清皇盼猶  
歌帝力况我能仁惟神不測誕生迦室利見王城機罩  
有應業會無生長驅定境振旅魔營恩兼動植勢絕隨  
迎鷺山傾仞鶴林埋景慧日西沉慈波東騁競窺靈相  
爭參佛影月殿分城雲龕動嶺長江舊域廣漢遺區川

分潼峽塞接岷渝閭閻四會亭障威紆爰開寶地實控  
名都霞牆百雉雲甍四住紫闕尋煙蘋樓結霧波流虹  
起雷奔蠖步網罩星鶉璫栖月兔靈機藻緯禪室安閒  
珎金範玉舉翠浮丹神宮不夜虛室長寒光超有色貺  
出無端清露花徑飛泉葉戶礪綠苔秋山蒼樹古茫茫  
庶類巍巍淨土鵝鷺同歸華夷共聚第一義諦寥廓法  
門迹離生滅思舉乾坤情迷則復道在為尊惟名與器  
萬古長存



王子安集卷十四

欽定四庫全書

王子安集卷十五

唐 王勃 撰

碑

益州德陽縣善寂寺碑

若夫玉繩高曜分寶厯於皇階金榜洞開道瑣暉於帝  
幄雖復蒼梧北望湖湘盈舜后之歌綠荇西浮江漢積  
文妃之頌未有激揚煩蔭栖妙果於香城揮發蓋纏樹

冥基於淨域則紫房丹室猶居燬宅之間朱紱瑤筐未  
出塵籠之際我國家鳳翔元氣駕黃幄而層飛龍躍太  
虛絕蒼根而止僖文皇帝以八才御歷光昇岱野之榮  
文德后以十亂乘時恭贊塗山之業握仁王之寶鏡日  
月重光驅梵帝之金輪雷霆靜祲湟槃甘露承眷而宵  
流般若靈音襍祥以晝引蛟臺屨閣俄交震旦之墟月  
面星毫坐照毗邪之國善寂寺者蓋舊寺之餘趾梁武帝  
之所建也爾其碧雞仙宇分絕障於金堤石兔遙源控

長江於玉峽封畿四會龍垆舍衛之壇里閤三分鹿野  
經行之地洎蒼鶩上擊銅馬交馳祇園興板蕩之悲沙  
界積淪胥之痛火炎崑岳高臺與鴈塔俱平水浸天街  
曲岸與猴池共盡山川隱嶙空傳鶩嶺之基灌莽蕭條  
非復鶩林之樹武德伊始君子道亨正皇極而撫寰中  
登太階而臨天下函闕雲物更逢真聖之期井絡星辰  
重集會昌之運雖開基撥亂獄訟知歸而繼絕興亡經  
綸未暇先皇統業貞觀御宸奉文物於三天布聲名於

十地參羅上下充橐籥於襟懷八部神祇薦圖書於掌  
握皇寶降地花昇含生無昏墊之虞法衆有來蘇之望  
俄而後庭構癘椒房穆卜六宮震恐三靈愕眙馳瑤展  
幣有事於羣宗碧劑玄針無徵於衆術帝廼降監迴慮  
屏壁與珠追勝跡於靈闕事良緣於福地爰紆聖綽重  
啓禪宮峙璇刹於將傾鎮銀繩於已絕絲綸既洽棟宇  
行周坤德用寧陰儀再朗於是林衡授矩周官詮揆日  
之工梓匠揮斤荆客鍊成風之巧重楹畫拱坐出天霄



複樹文閨俛臨電宇顯慶中縣令蕭君道弘理鈎繩於  
日用憑藻績於天成仙官之妙匠可尋盧舍之神模不  
墜凋甍鶴翥曳珠網於星津繡桷虬伸吐璿璫於月徑  
綠房丹鎖彩綴晴霞紫閣青疏光含薄霧春風瓊樹香  
飄席上之蘭秋水銀塘影數軒中之芰晨光轉卉翻寶  
字之龍花溽露低枝蕩真文於貝葉天童潤色黃珉碧  
玉之壇海聖彌縫師子龍王之會建靈幢於厚夜琢飾  
年深懸法鼓於迷津規模歲遠時又於佛堂東壁畫二

聖僧丹青未畢大啓神光鄰玉塵之崇輝發金龕之寶  
相朱軒夕朗似遊明月之宮紺宇晨融若對流霞之闕  
繇是岷英蜀秀攀講序以雲趨帶鸞裙鸞仰齋庭而霧  
合貪機大阻淨施旁流綺羅分解珮之因軒益得捐金  
之所靈妃翳日捨翠幄於香筵仙客停雲落霓裳於寶  
地自非冲姿密契景應潛周豈能昭義祉於氤氲動玄  
機於肸鬻者也爰有上座弘一節並沈研性符隱括仁  
棠凝妙律於神珠肅靈椒於寶印太昊奉檝截苦海而

橫流風伯扶輪歷邪山而効駕騰燭龍於慧炬俯鏡重  
昏奏鳴鳳於天歌下清羣籟摩珍在握遙臨七寶之宮  
正覺為心俯闢三乘之路湛衢鑄於忍地品藻雞園推  
水砥於言河扶持象化縣令宇文某河南人也帝隋尚  
書之元孫皇唐侍中之令子爾其虹旗萬里御六氣而  
鵬翻霜戟千羣擁三州而鶚視帝葉皇枝之重對越乾  
坤金滕石匱之功光華宇宙公上流提慶中和毓祉見  
鐘鼎於南鄰奉軒裳於北闕雲姿月步下瑤澤而追風

雪羽霞翎歷珠田而矯霧芳蘭公子即以地業高人幽  
桂王孫即以琴樽待物叙薇猷於禮樂則俎豆縱橫談  
賞契於林泉則烟霞咫尺自裁聲百里揆化雙州收武  
城之故事擇中牟之令典仁風易狎候丹翟於春垌惠  
化難經佇青鸞於曉墅山巨源之遠量嘯傲行藏謝太  
傅之高風從容語嘿縣丞王敬衣簪舊族孝友名家白  
虹絨抵鵲之光紫電蓄衝牛之氣七年高秀拂層漢以  
非遙六月雄圖擊長波而未遠鄉耆等少承榮緒中區

勝族門稱東別之標地接西隅之嚮麗君平之履道盛  
德家傳秦子整之談天風流代襲咸以為妙圖真諦事  
出於無名翠琰玄碑道凝於不朽弇州北跨猶疏駮驥  
之銘文石東區尚勒元龜之頌況乎玉衣流慶事屬於  
仙幃金屋延祥福纏於梵宇爰求勝筆載記芳謠下官  
弱植少徒薄游多暇薜蘿人事空餘江海之心筆札神  
交尚有淵雲之氣相如謝病訪詩酒於臨邛夫子栖遲  
聽絃歌於單父羣公以道之存矣思傳記德之書下官

以文在茲乎願展當仁之筆其詞曰

蜀嶺東漸岷山西積月峽星橋勝金孕碧盱嚨靈兆丘  
墟梵迹鴈塔推基鹿苑遺跡肅肅黃運英英文母配乾  
垂慶儀坤握矩寵照香城仁沾淨土爰光大壯聿求多  
祚青牛福地白鶴禪林重扃霧敞複殿雲深龕雕翠玉  
剎樹黃金龜鏡夕照鳳鐸晨吟慧樓彌望化臺出沒棟  
列長虹窓栖明月果脣周映蓮眸間發雨霽猴池烟生  
龍窟肅穆禪衆優游令宰方駕康衢連舟性海驚岳增

飾雞林潤彩藻繪相尋丹青盡在我今懷矣窮路何歧  
承風詠德展義陳詞百年心事千載風期東西南北栖  
遑幾時

益州綿竹縣武都山淨慧寺碑

原夫帝機寥廓雲雷驅妙有之功正氣洪荒清濁構乾  
元之象融而為川瀆結而為山岳五城韜海接崑閬於  
大都八洞藏雲冠瀛洲於巨闕造化之所偃薄靈谷之  
所啓處極緹油而縱觀詠頌寧殫出宇宙而高尋風烟

罕測是知玉卮無當遐荒非視聽之津金榜所存城闕  
盡江湖之致何必九蚪齊驚直訪銀宮八駿長驅遙臨  
石室武都山淨慧寺者梁大清年中之所建也名山列  
岳之舊仙都福地之湊黃龍負匣著寶籍於經山紫鳳  
銜書蔭榮光於井絡須彌峯頂仍開梵帝之宮如意城  
中即有經行之地爾其盤基跨險列嶂憑霄日月之所  
竄伏烟霞之所枕倚飛泉瀑溜蕩滌崩崖綠樹玄藤網  
羅丘壑飛塵作氣被萬吹於中巖帝琰司寒宅千霜於



北谷丹梯碧洞杳冥林岫之間桂廡松楹寂寞風塵之  
表是稱英鎮實瞰崇岡閭閻當四會之街城邑辨三分  
之地綿碕錦瀆下浸重巒玉阜銅陵旁分絕磴山川絡  
繹崩騰宇宙之心原隰縱橫隱軫亭臯之勢頃以黃旗  
夜徙紫蓋晨傾九服失圖三靈在疚奸臣躍馬據折坂  
而吟雲壯士聞雞擁陽關而嘯雨岷峨失險化為鋒鏑之  
場江漢橫流非復朝宗之國禪宇繇其覆沒法衆是以  
凋淪國家奄有帝圖削平天囂紫宸反照皇階即叙萬

國順百靈朝幽顯再立華戎一揆燭龍韜景避堯日於  
幽都雲鵬斂翼候虞風於晏海以為軒階具美功窮望  
稷之臺漢道兼弘力盡祈年之觀爰經寶地大啓祥宮  
撫香象而高視鳴法螺而再唱龍垣淨土連帝道而重  
光鶴苑崇基脫皇居而首出况乎山精舊壤下鎮偏隅  
天帝遺墟上千躔次王舍城之宮闕白玉猶存給孤獨  
之園林黃金尚在法物繇其大備盛德所以相尋株兵  
奉天藏之圖泉女獻山祇之籍離亭合榭因岸谷之高

低疊觀連房執岡巒之曲直丹崖反照畫拱相臨綠障  
斜烟雕簾間出豐隆曉震次複雷而悽皇列缺晨奔望  
崇軒而愕眙千香寶樹自起風烟九乳仙鐘獨鳴霜雪  
銀龕佛影遙承鴈塔之花石壁經文下映龍宮之葉虹  
生北澗即掛新幡鳳下東岑還栖舊剎若乃尋曲岨歷  
崇隈周行數里直上千仞蒼松蓄吹臨絕逕而疏寒黛  
篠防烟繞迴疆而結蔭春巖橘柚影入山堂秋壑芙蓉  
光浮水殿亦有山童採葛入丹竇而忘歸野老紆花向

青溪而不返山神獻果送出菴園天女持花來遊淨國  
實杳冥之秘訣託幽深之逸境豈直淮南桂樹暫得仙  
家江左桃源終迷故老而已爰有寬閭梨者俗姓楊氏  
其先華陰人也因官徙地家於綿竹山分太華水帶長  
汾川岳會同風雲感召玄經素論侍郎居八俊之英綠  
綬黃軒太尉列三台之首法師玉函降彩金瓶探色振  
八解之遙源踐三明之廣路靈機入證窮象載於初髻  
妙諦因心釋羊車於弱冠三千法界繇廣位而出無明

十二因緣自普濟而登彼岸弘宣誓願大振沈黎揮覺  
劍而破邪山揚智燈而照昏室彌綸所被白馬盡於禺  
同權漸所開黃牛至於嶠冢虔誠樂土憩影茲峯迺以  
貞觀九年於寺西院立七佛堂一僧舍星毫動牖月面  
分堦彩鳳銜旒神龍負塔飛烟湧座龕龕忉剎之天香  
霧成臺樹樹菩提之果朝散大夫行縣令清河張楚親  
承妙業俯刊貞琰林宗有道伯喈無愧法師夙機少悟  
應變多奇玉山中斷瓊林下雜支道林之好事語嘿方

融釋慧遠之高居風埃遂隔泊乎坐忘遺照返寂歸真  
城肆颯然若遺空山黯而無色豈直巖枝泣血磳戶摧  
梁而已哉縣令劉照彭城人也自礪山仗劍綰鳳歷於  
雲臺春郊授鉞嗣龍圖於白水玉壘三分之胄下雜公  
門金陵一霸之基旁參帝緒翠綏丹紱歷今古而先鳴  
人傑地靈冠山川而得儔君膺岳瀆之秀挺風雲之會  
昆溪劍鏑直照胷襟楚澤珪璋潛周履行魯恭明德方  
昇漢輔之階潘岳能文且職河陽之縣仁徽可被闔境

仰其風猷威德所加百城疊其霜彩尚乃康莊妙域光  
開不捨之壇舟楫愛河昭暢無生之業痛驚林之殄瘁  
悲象教之榛蕪爰命緝興式光泉藪虎溪龍澗近分廬  
岳之圖金闕瑤臺更討瀛洲之記銘曰

武都仙鎮龍墟粵域邑動香城山開淨國澗流百道峰  
雲五色谷暗藤斜山高樹逼千楣鶴列萬拱星懸分林  
構址接磴開廬臨階竹樹遶棟風烟龕前怪石塔下秋  
泉綠崖疏逕青岑拒室霧道相縈烟房互出葉濃磳淨

花深嶂密鳥度難尋猿驚易失簷分石竇地絡金沙丹  
丘抗月碧洞栖霞松開野路桂列仙家仙鑪柏葉寶座  
蓮花砌因巖曲橋隨峯返果出天厨香來仙苑玉鑄啓  
曙金璫照晚谷思鐘張山悲鐸遠閭閻踐勝銅墨高情  
聲飛別邑望動專城懸金道肆刻石山楹千載之後吁  
嗟令名

梓州郪縣兜率寺浮圖碑

若夫仙樓白玉窮冥崑閭之墟神闕黃金寂寞蓬瀛之



浦斯則岡巒髣髴稽鳳冊而空存島嶼憑陵艤龍舟而罕迨至若按皇軒於夏籙考璿構於殷圖周王北洛之官秦帝南山之閣西京故事下聽雷霆東國餘基俛臨風雨莫不陵遷谷變共榛灌而丘墟火絕烟沉與雲雨而塊莽其有據坤靈之寶位借神道之冥扶占象緯而圖基揆川原而宅址蜂臺映月還臨舍衛之城鴈塔尋雲即對嶠閣之嶺成而不毀者將斯之謂與堯率寺者隋開皇中之所建也爾其林泉糾合之勢山川表裏之制

抽紫巖而四絕疊丹峯而萬變連溪拒壑所以控引太  
虛蒸雲駕雨所以盪洩元氣涪江千仞波潮將旭日爭  
光都城百雉薨棟與晴霞共色信先造化之奇模盡登  
臨之妙境玄房霧轉抗金樞於桂岳之前紺殿星開栖  
玉刹於梅林之下巖花落沼近拂天衣澗葉低陰斜籠  
寶座宵汀鶴警乘鼓吹而齊鳴曉峽猿清挾霜鐘而赴  
節若乃巡碧磴歷玄階鎖窓澄彩瓊鋪洞照神姿滿月  
疑臨石鏡之峯衆馥揚烟似對香爐之岳信可下清人

境上配天都為勝地之先鳴執名山之右契者也爰有  
信弟子某乙等夙祛塵網早植慈根悲梵室之未弘悼  
禪居之猶褊以為上棟下宇河圖避風雨之災廣榭崇  
臺時令著高明之宅是以菩提長者競潔舍衛之壇天  
帝人王爭闢仙宮之塔則知威容下麗羣生鮮瞻仰之  
因材樸重瑤黎人有子來之地乃於寺內建浮圖一所  
某年月日鄉望等兆基弘願繼發淨因陵轡中天規模  
大壯高列砌架迴浮輕軒直上千尋周迴百步占氛候

景神祇叶幽贊之功揆墨端行班倅逞絕羣之思收岱  
宗之杞梓聚崑山之玉石土兼五色金逾百鍊龍蟠萬  
拱策屏翳而高驤鶴矯千楣冠扶搖而獨運重簷鵲鵲雲  
將反覆於櫺軒洞宇寥寥風伯栖遑於戶牖仙娥去月  
旅方鏡而忘歸寶婺辭星攀圓璫而未返玄霓湛霽若  
鵬飛之戾九天丹檻聯騫如鳳翔之據千仞每至韶光  
照湛爽霽晴遙列郊墟於四野開雲氣於千里風恬雨  
霽烟霧藻天地之容野曠川明風景挾江山之助則有

瑤簾繡軸排淨域而停輪寶騎銀鞍指珍臺而聳轡於  
是披岫幌抵巖扃攀翠複而三休步玄梁而十憩廊軒  
外敞淑氣長延陰室中開鮮飈自激俯環瀛而極望積  
蘇非遙出雲漢而高踐靈槎可記真福地之殊觀香城  
之巨麗者乎寺主等沈研二諦振耀三關抵蒼壁於邪  
山攬玄珠於定水挹其流者曲成般若之緣承其風者  
濬發菩提之願長史河東裴某風神朗潤操履貞勤蕭  
條江海之心磊砢冰霜之節下岷關而叱馭寄切全都臨

蜀野而宣條功深半刺縣令衛玄海內高流河東望族  
榮高銅墨任屈絃歌浹辰而風化大行踰月而奸豪屏  
氣陶潛彭澤自得高人王吉臨邛仍延重客縣丞胡敬  
仁三河舊族一代良材提鎔鋤而願割跼驂騮而待步  
江湖秋至方懷縱壑之圖海浪風高未接垂天之翼鄉  
望等並中和受氣孝友承家才稱江漢之靈地實岷峨  
之秀或以時良入選擢迹鄉鄰或以朝望來儀升名郡  
縣並沐康衢之化俱承比屋之封瞻彼岸而同歸登春

臺而共樂咸以垣墉遽覆猶傳路寢之歌銀鼎俄窮尚  
勒靈臺之頌况乎崇基奕奕與天地而爭工層構峩峩  
配山川而永固豈可使弘規在我空存蔽日之基雄筆  
同時不借凌雲之氣謹聞命矣乃作銘云

二象成紀三才定位開剖太虛導引元氣紛紛化迹飈  
颺聖致行傑趣約歸同葉異法王西眷教迹東遊功超  
道茂義冠儒流丹青既備棟宇旋周梵宮霞積香閣星  
浮緬想蓬瀛金臺迥起曠瞻崑閭瑤房峻峙壯矣名都

神居休止大哉英服茲峯誕紀金繩對嶺玉牂分岑松  
扃委鬱桂幌深沈雲龕樹晦烟洞花深重巒霧結複磧  
泉吟肅肅禪衆遙遙淨境鹿野經文龍宮拂影梵榛金  
室光來石井峽曉猿清池曛鶴警岷峨舊族江漢英姿  
爭開法願重崇峻基占雲接廡揆景分墀天人合應幽  
顯呈期靈思孤出神模獨湧霧積千楹霞張萬拱玉牖  
星羅璿璫月擁複榭龍蟠重甍鳳聳莪莪峻岳奕奕崇  
標琬簾切漢寶綴凌霄深窓閟景洞戶流飈銀缸夕映



珠鐸晨搖我辭秦隴來遊巴蜀勝地歸心名都憩足甫  
逮鄉縣頻移灰燭聿從良時仍尋妙躅曠望原陸周流  
江汜桃李春風芙蓉秋水烟霞四面關山千里他鄉寓  
目茲焉復幾

梓州郫縣靈瑞寺浮圖碑

若夫神州括地寰中分五嶽之圖巨壑浮天海上擢三  
山之秀造化之所樞紐靈仙之所窟宅故得昭灼天漢  
發揮雲氣牛頭山者即廣漢之名峰也圓喬幾乎數里

直上逾乎百仞若乃巖泉銑石之什風烟草木之狀傾  
九圍而得雋環四時而競爽蒼岑隱嶙旁分玉砌之階  
碧洞逶迤下掬金陵之苑實羣聖之所託也隋開皇中  
王秀作牧益州來窺勝地首旌嘉號仍疏淨域因危裂  
戶就嶺磴之成規跨險分榮借岡巒之迴勢工窮雕鏤  
妙出丹青飛棟神行迴蕙靈構又於山頂別建浮圖隋  
運告遷明皇首出軒疏琬昧基礎堙蕪奄興宣榭之災  
施及栢梁之燼鄉望等馳心妙律夙契禪居悲梵宇之

摧梁痛珍臺之絕構思弘法願重緝奇功黨且千家集  
惟巨萬以為玉樓星峙稽閭苑之全模金闕霞飛得瀛  
洲之故事指香城而聳睇臨火宅而危魂參妙範於神  
明騁良工於宇宙飛廉按轡定樞臬於風衢羲和頓第  
揆鈎繩於日路雕簷畫拱龍迴紫漢之間復雷重欒鳳  
舉丹霄之外瓊扉暮敞推日月於金鋪繡桷晨開落繁  
星於玉砌每至兩江春返四野初晴山川霽而風景涼  
林甸清而雲霧絕沙汀道暖落花與新燕爭飛城邑迎

欽定四庫全書

王司馬集  
卷十五

寒涼葉共初鴻競起則有都人襲賞憑朱檻而披襟野客  
含情俯丹樞而極睇窮百年之後樂寫千里之長懷信  
可以澡雪精神清疎視聽而息機心於紛擾置懷抱  
於真寂者矣且勃旅遊岷徼漂舉涪鄉年晷一窮時灰  
七變王陽西上方驚斂轡之心王粲南征實動登樓之  
思我之懷矣乃作頌曰

大塊甄成名山作寺發地龍盤千霄鳳峙風雪萬邑岡  
巒千里絕域天成珍臺地起揆剎玄嶺圖基丹岵層棟

崢嶸重簷窳窳有隋紊厯重明改照事與時遷迹從原  
燎義均除舊事切維新如或繼者代有其人聲飛隴蜀  
望動州隣爭開爭施競植靈因控險裁標循危列構巖  
烟接廡峰雲對雷鐸運星衢璫懸月竇紫軒霧合丹梁  
露透暮春疏節新秋戒序照蒲暄郊氣銷寒渚樹濃鶯  
亂川長鴈舉流涕寫懷魂馳意與偉哉靈宇壯矣全摹  
窮高極麗遠覽長圖賞因時合筆為神驅有情君子誰  
為捨乎

王子安集卷十五

欽定四庫全書

王子安集卷十六

唐 王勃 撰

碑

廣州寶莊嚴寺舍利塔碑

昔者萬人疾疫神農鞭草而救之四維凋瘵夏禹刊木  
以除之豈非物外其性則道功出事憊其和則任跡著  
傍稽素篆仰叩玄扉卽時義而規大覺因彝倫而佇真

諦向使三災克殄八正咸修人握戒珠家藏寶印則三  
十二相不可得而視也八萬四千法不可得而聞也然  
則聖人以運否而生神機以道喪而顯況迦維授手摩  
竭推心高張妙用之功自極橫流之弊蓋不獲已豈徒  
然哉故能業擁大千化形真一繇樂推而起七覺因來  
蘇而坐三昧發揮五演以寂滅為身常提挈四流用慈  
悲為化迹黑風宵遁波旬忘反噬之心綠沼晨開天常  
識問津之所括夷塗於九相蹇步其安納慧畧於重昏



迷方自曉大矣哉應物而起興運而終至自於崑冥復  
歸於無物雖金沙宴駕雙林無可作之期而玉謀遺文  
六塵有經行之俗象法不可以無主微言不可以遂喪  
六千羅漢競結香緣五百仙人分開講肆星龕月殿俄  
盈震旦之墟鳳剎蠅旌坐遍閻浮之域屈伸闔闢其道  
矣哉夫寶莊嚴舍利塔者梁大同三年內道場沙門曇  
俗法師之所立也其瑯琊貴族則漢庭峻節祖德猶傳  
梁甫高吟嘉聲未遠法師夙登真地深入慧門照果業

於三明拂塵勞於八解羊車綺歲懸欣半月之詞鳳閣  
鷲年已振彌天之響道惟堅固行乃頭陀百結斯安斥  
羅綃而罷御十珍雖貴對藜藿而甘心於時以石應天  
人大弘緇侶法師至誠幽感獨步玄宗豈真王公欽振  
錫之風固亦天子降同輿之禮寶瓶宵注則雨露隨軒  
玉柄朝撝則風霜滿席既而素懷有在潛營擯俗之圖  
爰定我居首託栖霞之寺爾乃巖開石雷邑跨金陵魚  
峰多讚唄之懽虎溪有送迎之限紫蘿山徑居藏勝緣

青松磧戶坐諧幽致枕石漱流者久之原夫見化有緣  
應身欲謝昊天罔極追懷自遠故有諸天會聚共位神  
光列國交兵獨超塵劫譯求其致豈不深哉然則麟鳳  
下靈猶稱瑞貺玉石微翫尚勝精彩亦有楚鐸淪照擢  
紫靄以衡星周鼎沈華吐黃雲而噴景誠浩作者之迷  
足稱希代之貴況乎釋迦妙相如來真骨雖八萬四千  
之寶塔散在羣方而九十二道之靈虹終聞間出立誠  
斯應瞻庭廡而時逢非德不鄰歷山川而罕致是以優

填頤顙思存電下之光波應投身願奉巖間之影粵在  
梁武精求不服以爲秦登碣石而事止尋仙漢索瀛洲  
而心非好善於是齋筵鳳設上祈忉利之宮講帳星隨  
下請龍王之藏輕齋棹海重賞梯山庶玉匣之全移幸  
金棺之半啟以法師智遺人我識洞幽明思假鈔因冀  
通靈感爰承綸紼載踐滄溟過石門而右指歷銅標而  
左顧秉桴月沂戒楫星沼相彼遐陬實惟荒裔一音演  
說本承聽受之鄉五日繼明素隔照臨之域珍奇乃萃

聖德攸傳則知有感必臻信覃幽境不行而至豈隔殊  
方法師既達國城式數朝命受銑筐而頂禮撫瑤緘而  
跪發盡收其寶重載而歸亦猶珠匿弊衣須馬鳴而後  
用金藏陋宇待龍樹而方開梁氏之都妙箕而仰神光  
家之繇也

十四字疑  
有脫誤

炎涼可質往反九十旬揖柁不輟

風潮八千里以大周三歲屆于茲邑法師性豐幽澹質  
固虛羸綿歷是淹疲疴屢積維摩見柄蓋伸方便之門  
道安謝歸思遠朝廷之事願居此剎有詔許焉仍分舍

利俾弘真福國惟甌駱郡實番禺爾其封疆跨躡之壯  
海陸會同之衝上當星紀下裂坤維階百越而鄰三吳  
軼雕題而陬交趾神化氣色汀洲建不死之鄉舜禹精  
靈原隰現行宮之地閭閻霧撲士女雲流謳歌有霸道  
之餘毗俗得華風之雜蜃樓高峙猶埋夕帳螺臺峻績  
尚識朝基信夷夏之奧區而仙靈之窟宅也此寺乃曩  
在宋朝早筵題目法師聿提神足願啟規模爰於殿前  
更須彌之塔因緣盛力人以予來徵日官而正墨集風

師而舉草育王奔令掃地戶而獻神兵梵事馳心感天  
官而下靈匠崇階遽積寶樹俄周不殊仙造還如湧出  
故其粉畫之妙丹青之要璿基岌其六時琬闌紛其四  
照仙楹架雨若披雲翳之宮綵檻臨風似過扶搖之路  
散華璫於月徑壁合非遙撥冒網於星潄珠連可驗玉  
虬承雷縹雲竇而將騫金爵提甍拂烟衢而待翥瑤窗  
繡戶洞達交輝方井圓泉參差倒影雕鐫備勒飛禽走  
獸之奇藻繪爭開複地重天之奕懸梁九息良馬駿走

而未窮疊磴三休的盧騁捷而知倦是栖銀櫛用府璫  
函採舍衛之遺模得浮圖之故事爰自梁末以迄皇初  
城邑屢新軒墀若舊雖復百魔蜩沸聽鼓鐸而懷音六  
賊蜂屯仰楮欒而草面多迴淨施罕犯仁宮則知會吹  
及遐斯同偃草慈雲所潤豈直流根故能比蜀守之祠堂  
長為典制均魯王之秘殿若有明徵而其作鎮一隅俯  
窮荒而獨秀盤基有地冠終古而長存者乎國家業擁  
神州建用皇極高祖以援疑撥亂伏紫氣而登三太宗



以端拱繼明自黃離而用九皇上纘乾坤之令業振文  
武之英風太階平而百度理中國定而兆人樂時和歲  
阜邑頌塗歌以五刑不用六械徒設舟車四達誰論貢  
賦之差襟帶八荒非復華夷之隔天寶降地符昇木石  
甄祉飛沈効慶雖叶和制變實類文思之功而持盈守  
成亦資連帥之助大中大夫使持節廣韶等州都督李  
某早登清貫夙踐崇軒嘉猷迴發於天朝善政果行於  
朞月越谿仙鐔吐光芒而駭人岱嶺寒松排風颭以成

性美哉稱繇功著鵲響徹於雲霄方為時須熊軾疲於  
道路廣陵單轂如送張網渤海亂繩復思龔遂王尊阜  
蓋欣臨折坂之前吳隱朱戟更集貪泉之右高名夙著  
佛化橫飛羣盜屏跡而歸農姦吏聞風而去職京坻坐  
積囷犴潛迴汲黯之卧淮陽直聞清淨王堂之居汝郡  
但舉賢良用能使檻穽不施猛獸巡江而遠竄市廛無  
擾商旅倍道而相歡颺風寢毒炎埃罷厲人稱有道家  
實無為加以援翰寫心自契真庶之旨高談見意不踰

玄嘿之津學究儒林真窮釋部知通人事且味禪宗道  
可以知歸物繇其顯會是歲也忽於此塔重覩神光玉  
林照灼金山具足倏來忽往類奔電之含雲吐燄流精  
若繁星之轉漢傾都共仰溢郭周窺士女幾乎數里光  
景動乎七重實孟冬之日也觀夫至道不私瑞生必繇  
乎樂國慶基有會福至必依於善人自非化足動微教  
非飾迹何以發真如之盛契壯實相之輝華在昔鳳集  
潁川宣后歸功于良守龍游湘浦章帝布德於賢臣歷

選前猷茲為故實然後上和下睦主聖臣良滅火返風  
雖有辭於進讓母修子應亦何愧於當仁至於百越衣  
纓三闕耆老或代道篁竹氣推丹桂之城家擅芝蘭名  
動蒼梧之野出平原而祛甲擁崇圍以鳴鐘並為蕃部  
之恩親覲招提之瑞同祈介福共潔齋壇罄龍象於南  
州盡衣鉢於西竺會吞方仗供備盂蘭法鼓振而沙界  
肅洪鐘鏘而鐵圍淨妙財爰捨法施爭流華轂扱於香  
城文駟填於寶廐錙藏巨億更入僧田價直百千還登

佛座豈徒照車十乘列隨氏之明珠盈筐萬金積大顛  
之寶具而已朝散大夫守長史某地乘華緒價握名流  
豫章擢而成榦騏驎生而躡影山濤天骨無情吏隱之  
間王衍風神自出塵埃之表自泰榮崩海作式瀛幽畧  
其小術包其大體振溫良之逸步得毗贊之弘綱布道  
移風善寵邦政歸休置驛獨守家聲然則野老行歌雖  
致功於露冕藩君坐嘯固藉美於題輿化成異壤抑繇  
同德故能道揚法教揮斥蓋纏家懷方廣之恩人慕韋

陀之學傳燈繼廣曳組成陰下逮府僚旁周縣寮並志  
薰修同希福慧可謂爾之教矣何日忘之者乎時有明  
威將軍行禺府折衝都尉李公天子之舊屬朝廷之夙  
將也靈根自遠聖族多奇受睇眄於甘泉奉衣纓於平  
樂青龍帶劍光超殿閣之榮白虎銜珠早陟齋壇之寵  
自臨閩外作鎮邊城湟水樓船遂勞都尉灞陵車馬尚  
識將軍魂驚斷雁之峯恩盡沈鳶之浦濡鱗涸轍處定  
水而彌勤撫翼香林在窮途而更切頻光法會薦委珠

珍護持攸仰招提是屬其兆基也如此經綸黼藻其大  
矣哉爰自上座實綸等並妙根宿植勝果將圓翰飛般  
若之林高步檀那之舍慈衿密洞散明月於談筵智鐸  
相輝化繁霜於寶办思琬琰式播徽猷弟子家嗣太  
邱忝閨門之薄宦地連雕渙竊藻繪之餘工爰託下才  
用旌高躅豈知仲宣旅泊方銜深井之悲長卿罷歸空  
負凌雲之氣我之懷矣乃作銘云

太息頽運嗟呼失道德弊為仁物壯則老繫猿情暗求

鴉計早赤水沈珠玄邱墜寶皇矣妙覺蒸然應期宗深  
微妙業奧慈悲燃燈匡俗捨筏濟時涅槃不住般若無  
思俯迹見生和光不減色音雖昧規模尚切猗歎上人  
穆彼惟新智頌八藏心超六塵淒涼燬宅解脫迷津鴻  
冥佇想龍蟄存身青蓋遺邦黃旗故服原隰形勢江山  
重複磻戶秋明巖盤夜燭鼓鐘于宮聲聞于外聿求紫  
闥言尋丹瀨絕域棲遑驚濤顛沛至誠冥感神珍顯會  
甄陶設險翼軫疏源尉陀餘國盧尋舊邊邑居雄盛人



物殷全是惟樂土實曰龍川護持靈刹莊嚴寶塔基構  
鼎新亭樂廬業奔日宵排歸雲曉納架壁三休連覺四  
合分惟星紀境控天池棟宇綿邈衡津推移神機丕應  
瑞景潛儀光合玉廡彩動金枝凡我僚庶同嗟權實周  
顛情勤王濛思逸咫尺幽鍵往來靈室共蔭法堂俱歸  
慧日四維信受三明弘益貝葉紛綸龍華烏奕講肆宏  
敞齋筵巨翼供引純陀飯迴香積天人合契幽顯同心  
傾家奉賄破產移琛軒裳曼鶯纓珮交臨蘭薰習遠檀

那意深偉哉連率冲乎德化職重隼裳秩遵熊駕酌貪  
貽則還淳息詐道濟香城禎凝寶舍琳琅什種杞梓緇  
徒調輕僧會辨折文殊奔螭易失令鼠難拘願刊貞琰  
永冠康衢伊我窮途欣茲勝謁文休泛海仲翔遊越尚  
想知音有懷明發謬惟雅顧叨陪天骨爰抽弱翰式敘  
高蹤孤音易竭獨賞難逢思起王粲悲生蔡邕豈無章  
甫誰適為容

行狀

常州刺史平原郡開國公行狀

某州縣洪飈未翔靈鳳垂翼景雲不燭神龍宛頸豈非  
時不可以苟遇道不可以虛行聖人作而萬物睹神功  
資而百寶用是以山川倒徙太階懷息亂之臣天地離  
乖元首佇康時之具則有得其數者於平原公見之矣  
自星虹沓祉開寶厯於軒圖雷電竊冥載休徵於魯識  
龍驪鳳起霸王存玉壘之雲紫蓋黃旗王迹著金陵之  
野故得卿才表秀疊彩駢蹤皐蓋朱幡連州北郡公侯

必復子孫承百代之基餘慶不忘仁義應千齡之運公  
鼎門疏照穴岫翔輝分嶽秀於樊侯稟辰精於傳說折  
旋儒館以六藝為笙簧軒翥翰林用兩京為鼓吹經邦  
化俗涉游夏之門庭減竈麾兵得孫吳之圖奧皇天眷  
命聖武膺圖覩物懷人思功去罪寰中有所曹參希執  
帛之榮閫外多虞周縶企中軍之寵見危授命藏器及  
時攀鳳羽於九霄候龍顏於千里蕭王內寢頻獻雅誠  
韓信齊壇屢遷優秩武德三年授中郎將俄遷大將軍

秦王統軍皇基肇闢天步猶難宸扆上相之榮仙夢  
受中權之寄被廬講將寶賴宏圖今日僉謀光應時望  
于時弄兵竊舉猶勤甲冑吞沙餌石尚阻河梁公制變  
以奇盪除以殺七擒三捷之畧緒著轅門拔旗穿札之  
能勲在盟府五年六月加上柱國隨班列也剪桐疏爵  
分茅建社下斷物土上格星躔唐虞著其升降周漢明  
其損益所以羽儀帝室蕃衛王畿懲惡勸善庸賢敘德  
高祖勲逾黜夏業擅戮黎置酒醴於南宮揚旌旆於東

府建皇帝之號安不忘危覽徹侯之籍榮而思報以公  
乃誠匪懈原始要終望嚴雪而識寒松觀疾風而知勁  
草九年封望都縣男貞觀元年改封縣侯文貌禁旅實  
著趨雄清道啓行允茲多士自非譽高朝諷價重人謠  
仍虧博望之儀必亂鉤陳之選公早陪戎律夙簡帝心  
敷歷二宮當仁不讓授左衛中郎俄遷右虞侯率蔥山  
狄壤蒲海蠻貊信要服之外區乃匈奴之右地境鄰虵  
澤乘勁席而鵬騰郡邇酒泉候霄塵而鶚視天子乃停

疏側聽負宸宸驚振洪策於古今溢嚴勲於覆載將使  
八紘昭泰銀臺應益地之圖九縣平夷瑤水流尋仙之  
駕貞觀某年授高昌道行營總管公道凝三畧功標五  
才逸氣縱橫雄精貫月象物而動鼓輦肅戰士之容推  
信而行歌舞表將軍之德裹糧坐甲輕死等於鴻毛投  
袂衝冠重義均於熊掌鑒空歸惠荒度來賓收鄭吉之  
前蹤復張騫之故事廟堂頌德魏闕酬庸光贊末條非  
公莫可某年授某州刺史尋以江淹粵域衡霍名區楚

情剽狡吳風澆競火耕水耨郡闕嫠女之精竦劍危冠  
人尋鱗諸之弊分宣演化卧理切於宸襟易俗遷訛行  
吟佇於人望貞觀某年遷睦州刺史政刑不隱考績連  
最俄授使持節松州都督今上鈞臺嗣厯鼎邑凝圖百  
城勞晉武之心千里揚漢宣之詔璽書加秩綬禮請藩  
綸煥增班事高恆典永徽中改沙州刺史屬鰲山亂德  
鴻水稽誅扶桑落日之濱妖朋蟻結孤竹尋雲之際孽  
黨蜂騰百濟遺黎託懸巢而斬氣三韓別種附危幕而



遊魂玉帳蒐兵佇責包茅之貢金壇令律將收桔矢之  
琛龍朔年中授公熊津道總管公昔從幕府早廁戎行  
覽兵法於軒轅受陰陽於呂望三門五壘得破敵之奇  
謀大艦雲梯總行軍之妙法故得戰無全陣野靡堅城  
撥金將躍馬暫臨銜壁與牽羊相繼豈惟秋方息亂遙  
聞定遠之名春谷投心遐想度遼之策若斯而已矣及  
三軍獻捷諸將論功帝嘉乃勲作鎮炎野授公廣州都  
督改封平原公以途鄰北戶地接南池珠崖魑魅之鄉

桐柱貪殘之境累藩斯寄歷任稱難於是受以春風臨  
以夏日明冠婚於縣邑布庠塾於閭閻薤本誅強奸豪  
屏氣棠陰察獄惇獨申哀理龔遂之亂繩解虞卿之錯  
節黃霸得循良之譽績未銜於邊城陳湯有方面之勲  
位不登於刺舉兼方具美其式茲乎朝廷以公屢叅伯  
牧駿歷班條吏不忍欺人無胥怨伏情馭極留連稷野  
之童託義訓毗惆悵耶溪之老雖有黃槐紫棘無以易  
堯盛嶽名都猶聞借寇麟德元年改授金紫光祿大夫

常州刺史既而天機忽爽大漸彌留白玉徒煎黃金難  
化台階側席方膺雄寬之尊玉女停機俄逢鵲衣之變  
以某年某月日春秋若干薨于公舍嗚呼哀哉惟公間  
氣呈姿靈和叶慶鳳鳴千仞鵬搏萬里情關峻遠得意  
於衆妙之門性宇沈凝忘筌於毀譽之境因心以至孝  
悌表於鄉閭臨義而行祿賜均於宗族故得虬蟠蠖屈  
服冕乘軒臨漢於締構之辰游梁於駭亂之際章溝霧  
闢曳鷗尾而晨趨甲館烟開奉旄頭而夜警鳴輦出塞

進李牧之奇誠露冕巡方受蘇章之直筆方當獻納黃  
屋揖拜青墀入東寺而掌壺處南臺而曳屨不謂藏舟  
夜涉負杖朝興丹丘之化未尋玄扃之痛俄及故怨深  
撤樂悲纏罷市者乎謹狀

王子安集卷十六

王勃傳

石  
晉劉 昫

王勃字子安絳州龍門人祖通隋蜀郡司戶書佐大業末  
棄官歸以著書講學為業依春秋體例自獲麟後歷秦漢  
至於後魏著紀年之書謂之元經又依孔子家語揚雄法  
言例為客主對答之說號曰中說皆為儒士所稱義寧元年卒  
門人薛收等相與議諡曰文中子二子福時福郊勃六歲解  
屬文構思無滯詞情英邁與兄勔勵才藻相類父友杜易簡  
常稱之曰此王氏三珠樹也勃年未及冠應幽素舉及第乾

封初詣闕上宸遊東岳頌時東都造乾元殿又上乾元殿頌  
沛王賢聞其名召為沛府修撰甚愛重之諸王鬪雞互有勝  
負勃戲為檄英王鷄文高宗覽之怒曰據此是交構之漸即  
日斥勃不令入府久之補虢州參軍勃恃才傲物為同僚所  
嫉有官奴曹達犯罪勃匿之又懼事洩乃殺達以塞口事發  
當誅會赦除名時勃父福時為雍州司戶參軍坐勃左遷交  
趾令上元二年勃往交趾省父道出江中為採蓮賦以見意  
其辭甚美渡南海墮水而卒時年二十八勳弱冠進士登第

累除太子典膳丞長壽中擢為鳳閣舍人時壽春王成器衡陽王成義等五王初出閣同日授冊有司撰儀注忘載冊文及百僚在列方知闕禮宰相相顧失色勳立召書吏五人各令執筆口占分寫一時俱畢詞理典贍人皆歎服尋加弘文館學士兼知天官侍郎勳頗任權勢交結非類萬歲通天二年基連耀謀逆事泄勳坐與耀善并弟勔並伏誅勔累官至涇州刺史神龍初有詔追復勳勔官位福時天后朝以子貴累轉澤州長史卒初吏部侍郎裴行儉典選有知人之鑒見

勸與蘇味道謂人曰二子亦當掌銓衡之任李敬玄尤重楊  
炯盧照隣駱賓王與勃等四人必當顯貴行儉曰士之致遠  
先器識而後文藝勃等雖有文才而浮躁淺露豈享爵祿之  
器耶楊子沈靜應至今長餘得令終為韋果如其言勃文章  
邁捷下筆則成尤好著書撰周易發揮五卷及次論等書數  
部勃亡後並多遺失有文集三十卷勃聰警絕衆於推步歷  
算尤精嘗作大唐千歲曆言唐德靈長千年合承周隋短祚  
其論大旨云以土王者五十代而一千年金王者四十九代而九



百年水王者二十代而六百年木王者三十代而八百年火王者二十代而七百年此天地之常期符歷之數也自黃帝至漢並是五運真主五行已遍土運復歸唐德承之宜矣魏晉至於周隋咸非正統五行之沴氣也故不可承之大率類此

王勃傳

宋宋 祁

王勃字子安絳州龍門人六歲善文辭九歲得顏師古注漢書讀之作指瑕以摘其失麟德初劉祥道巡行關內勅上書自陳祥道表于朝對策高第年未及冠授朝

散郎數獻頌闕下沛王聞其名召署府修撰論次平臺  
祕畧書成王愛重之是時諸王鬪雞勃戲為文檄英王  
雞高宗怒曰是且交構斥出府勃既廢客劔南嘗登葛  
幘山曠望慨然思諸葛亮之功賦詩見情聞虢州多藥  
草求補叅軍倚才陵藉為僚吏共嫉官奴曹達抵罪匿  
勃所懼事洩輒殺之事覺當誅會赦除名父福時繇雍  
州司功參軍坐勃故左遷交趾令勃往省度海溺水瘁  
而卒年二十九初道出鍾陵九月九日都督大宴滕王

閣宿命其婿作序以夸客因出紙筆徧請客莫敢當至  
勃慨然不辭都督怒起更衣遣吏伺其文輒報一再報  
語益奇乃矍然曰天才也請遂成文極歡罷勃屬文初  
不精思先磨墨數升則酣飲引被覆面卧及寤援筆成  
篇不易一字時人謂勃為腹藁尤喜著書初祖通隋末  
居白牛溪教授門人甚衆嘗起漢魏盡晉作書百二十  
篇以續古尚書後亡其序有錄無書者十篇勃補完缺  
逸定著二十五篇嘗謂人子不可不知醫時長安曹元

有秘術勃從之游盡得其要嘗讀易夜夢若有告者曰  
易有太極子勉思之寤而作易發揮數篇至晉卦會病  
止又謂王者乘土王世五十數盡千年乘金王世四十  
九數九百年乘水王世二十數六百年乘木王世三十  
數八百年乘火王世二十數七百年天地之常也自黃  
帝至漢五運適周土復歸唐唐應繼周漢不可承周隋  
短祚乃斥魏晉以降非真主正統皆五行沴氣遂作唐  
家千歲歷武后時李嗣真請以周漢為二王後而廢周

隋中宗復用周隋天寶中太平久上言者多以詭異進  
有崔昌者采勃舊說上五行應運歷請承周漢廢周隋  
為閏右相李林甫亦贊右之集公卿議可否集賢學士  
衛包起居舍人閻伯璵表上曰都堂集議之夕四星聚  
於尾天意昭然矣於是玄宗下詔以唐承漢黜隋以前  
帝王廢介鄴公尊周漢為二王後以商為三恪京城起  
周武王漢高祖廟授崔昌太子贊善大夫衛包司虞員  
外郎楊國忠為右相自稱隋宗建議復用魏為三恪周

隋為二王後鄴介二公復舊封貶崔昌烏雷尉衛包夜  
郎尉閻伯璵涪川尉勅兄勸弟助皆第進士勸長壽中  
為鳳閣舍人壽春等五王出閣有司具儀忘載冊文羣  
臣已在乃悟其闕宰相失色勸召五吏執筆分占其辭  
粲然皆畢人人嗟服尋加弘文館學士兼知天官侍郎  
始裴行儉典選見勸與蘇味道曰二子者皆銓衡才至  
是語驗勸素善劉思禮用為箕州刺史與綦連耀謀反  
勸與兄涇州刺史勔及助皆坐誅神龍初詔復官助字

子功七歲喪母哀號隣里為泣居父憂毀骨立服除為  
監察御史裏行初勛勅皆著才名故杜易簡稱三珠  
樹其後助勛又以文顯勛早卒福時少子勸亦有文福  
時嘗詫韓思彥思彥戲曰武子有馬癖君有譽兒癖王  
家癖何多耶使助出其文思彥曰生子若是可夸也勅  
與楊炯盧照隣駱賓王皆以文章齊名天下稱王楊盧  
駱四傑炯嘗曰吾媿在盧前耻居王後議者謂然

遺事

王勃示知己詩云客書同十奏臣劍已三奔則不為無  
意於功名者夢游仙詩云乘月披金枝連星解瓊珮則  
不為無意於神仙者是以登葛嶺山而思武侯之功宿  
仙居觀而思霓衣之侶也又迷懷擬古詩云僕生二十  
祀有志十數年下策圖富貴上策懷神仙而二志竟不  
遂可勝嘆哉

韻語  
陽秋

### 集評

蕭明與王僧辯書凡諸部曲赴投戎行霜戈電戟無非



武庫之兵龍甲犀渠皆是靈臺之仗王勃滕王閣序紫  
電清霜王將軍之武庫正用此事以十四歲之童子胸  
中萬卷千載之下宿儒猶不能知其出處豈非間世奇  
才杜子美韓退之極其推服良有以也使勃與杜韓並  
世對毫恐地上老驥不能追雲中俊鶻也

丹鉛錄

褚淵碑風儀與秋月齊明音徽共春雲等濶庾信馬射  
賦落花與芝蓋齊飛楊柳共春旗一色隋長壽舍利碑  
浮雲共嶺松張蓋明月與巖桂分叢王勃滕王閣記本

此然勃之語何啻青出於藍前無古人也

丹鉛錄

滕王閣記至今稱之上已云綠齊山葉滿紅洩岼花銷  
九日云蘭氣添新酌花香染別衣又詠風云肅肅涼景  
生加我林壑清驅烟入洞戶卷霧出山楹去來固無跡  
動息如有情日落山水靜為君起松聲最有餘味真天

才也

唐詩紀事

王勃寺碑高臺與雁塔俱平曲岼與猴池共盡佛有五

精舍獼猴江其一也

楊用修外集

王勃河橋不相送江樹遠含情杜荀鶴承恩不在貌教

妾若為容皆五言律也然去後四句作絕乃妙

藝苑  
卮言

盧駱王楊號稱四傑詞旨華靡固沿陳隋之遺骨氣翩  
翩意象老境超然勝之五言遂為律家正始內子安稍

近樂府楊盧尚宗漢魏

藝苑  
卮言

### 糾謬

永嘉所刻初唐十二家其王子安集有田家三首過眼  
知非子安作細玩知為王無功作也張氏貴公子多食

客何以謬誤至此剔出以不誤觀者

田家三首

阮籍生平懶嵇康意氣疎相逢一飽醉獨坐數行  
書平池聊養鶴閒田且牧猪草生元亮徑花暗子  
雲居倚牀看婦織登隴課兒鋤迴頭尋仙子併是  
一空虛

家住箕山下門枕潁川濱不知今有漢唯言昔避  
秦琴伴庭前月酒勸後園春自得中林士何忝上

皇人

平生唯以樂作性不能無朝朝訪鄉里夜夜遣人  
酤家貧留客久不暇道精麓抽簾持益炬拔篲更  
燃爐怕聞飲不足何見有殘壺

補遺

王勃之先文中子見勃弄筆令作題太公遇文王贊曰  
姬昌好德呂望潛華城闕雖近風雲尚賒漁舟倚石釣  
浦橫沙路幽山僻溪深岸斜豹韜襍惡龍鈴辟邪雖逢

切近猶待安車君王握手何其晚耶

芝田錄

按楊炯序勃文集云陳羣稟太丘之訓時不逮焉是  
勃未及見祖也丁用晦云文中命之作頌恐誤姑闕  
之

